

ASO LUA, 17 IANUARI 2023

Na nofoia e le Fofoga Fetalai le Nofoa i le itula e 9:27 i le taeao e tusa ai ma Polokalame o Fonotaga a le Palemene 2022/2023.

Tatalo.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

Ua asamua se gagana a le Nofoa i leni taeao e fai ma sui o le tatou Maota nei e faaleo le taulaga o le faafetai ma le loto faamanu a'e i le Atua ona o Lona alofa ma Lona agalelei ua mafai ai ona tatou toe fesilafai i Lona matagofie mo le toe amatalia o le tatou galuega i leni tausaga fou 2023.

O lea foi le loto faafetai o le Fofoga Fetalai, o lea ua tatou feiloai i le manuia ma le fiafia, a o le lagi e mama ma le soifua manuia mai lo tatou Tapaau Sili i le lagi.

Taoto ia la le laau ma ona lala ina ua maea ona o tatou momoli le taulaga i le fata i leni taeao, aua o le viiga e tatau ona foi atu i lo tatou Atua. Tatou faamoemoe pea i le afi o le Agaga Paia e faamu ai le tatou taulaga.

E i ai le manatu o le Nofoa, e le faigofie paia faaifogata o Samoa ua atoa i le Maota nei, se i vaeatu lana faafofoga tapuai mai, leaga o Samoa o le atunuu ua uma ona tofi, i le afua mai le oneone le ufitia na toala fanau ai le taisamasama nai le fatifatialuga ma le fatifatialalo seia paia le siufanua nai le Fale-tapaau i ou paia faale-Malo, i le afio o lau Afioaga Mamalu i Le Ao o le Malo ma lau Masiofo, afio le Sui Tofia ma lou faletua, le mamalu o le tafatolu o itutino fefaatauagai o le tatou Malo a o le falalesee o le tatou Maota nei.

O paia faale-Talalelei, i le afio o faa-Ao o Ekalesia Kerisiano e fia, o ositaulaga ma auuuna tofofi a le Atua, o so tatou gafa sa saili i le lagi, o lo o tauasuina le vai o le upu o le ola aua se manuia auiluma o Samoa.

O paia faaleaganuu aua Aiga ma latou Tama, Tama foi ma Aiga, le usoga a Tumua ma Pule, Ituaa ma Alataua, Aiga i le Tai ma le Vaa o Fonoti. O le atoatagi lea o paia ma mamalu ua i le Maota nei. Ae a Tiafau o le Malae o le Faautugatagi a Samoa? Talofa, o paia e le popo i sau upu, a o le pa ati foi e le solo i sau gagana. O Samoa o le ua faalanumaaveave.

E le galo i le loto le tapuai mai a nai o tatou uso i Sasae, le afio o le Kovana Sili ma le Faletua, le Lutena Kovana ma le Kapeneta, le afio o le

Peresetene ma Senatoa o le Maota o le Senate. Afio foi le Fofoga Fetalai ma sui o le Maota o Sui, tainane le afio o le Faamasino Sili ma le Aiga o Faamasino. O paia lava ia aua Sua ma le Vaifanua, Fofu ma Aitulagi, Saole ma Saleaamua ma le Launiu na Saelua, Faatuiolemotu ma le Laau na Amotasi, le Faleagafulu ma Tootoo o le Faleula, ma upu i le Manuatele.

Ou te ofo alofa atu ma faatalofa atu, aemaise o moomooga alofa ma faamanuiaga mo lenei tausaga fou, faamalo le lagi e mama ma le soifua manuia. Tatou lalafo i le Atua le tatou folauga o lenei tausaga, ua na o Ia tatou te mafaia ai mea uma, ua na o Ia foi e lelei ai mea uma tatou te faia. O le Atua lava na Ia faamatutu le Ioritana ma Ia momoli mai lo outou soifua ma lo tatou ola i lenei itu o le vai, tau ina o tatou faamalolosi ma faatuatua ia te ia. Ua fou le tausaga. E i ai foi le manatu mauualuga o le Fofoga Fetalai, o le a afua atu ia i lo tatou Maota nei se taeao toe afua i suiga aupito sili ona lelei a o tapuai mai si o tatou atunuu.

O lau tatalo, ia i ai le agalelei o le Atua i sui usufono uma o le Palemene, ia manuia le usugafono i lenei taeao.

Samoa ma lau faafofoga tapuai mai, e le gata i Samoa nei ae faapea foi so o se tafa o le kelope, ia i ai le alofa ma le agalelei o le Atua i folauga tau amata o lenei tausaga. E manaomia lava lau tatalo aua le alofaiva o lau Palemene. Manuia tele lau tapuaiga i lenei taeao.

TUUIA ATU O PEPA

Na tolaulauina e le Failautusi i le Fono Aoa le faasologa o Pepa e tusa ai ma T.T.49(2).

1. P.P.2022/2023 Nu.102, Teuteuga Fautuaina i Tulafono Tumau 2022.
2. P.P.2022/2023 Nu.104, Lipoti Faaletausaga a le Pulega o Tupe Faava o Malo a Samoa mo le Tausaga Faaletupe 2021/2022.
3. P.P.2022/2023 Nu.135, Tali a le Malo i le P.P.2022/2023 Nu.51, Lipoti a le Komiti o le Vaega Tau i le Tamaoaiga i le P.P.2020/2021 Nu.111, Lipoti Faaletausaga a le Matagaluega o Mataupu Tau i le Va i Fafu ma Fefaatauaiga mo le Tausaga Faaletupe 2019/2020.

Ma le faaaloalo lau Afioa.

TUUIA ATU O LIPOTI A KOMITI FAA-PALEMENE

Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).

1. P.P.2022/2023 Nu.103, Lipoti a le Komiti o Tupe Maua ma Tupe Totogi i le Tala Faatatau o Tupe Faaopoopo (Nu.1) 2022/2023;
2. P.P.2022/2023 Nu.136, Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2022/2023 Nu.28, Lipoti o le Koviti-19 ma Aia Tatau a Tagata Soifua i Samoa 2022, Ofisa o le Komesina o Sulufaiga;
3. P.P.2022/2023 Nu.137, Lipoti a le Komiti o Tupe Maua ma Tupe Totogi i le P.P.2021/2022 Nu.146, Faamatalaga o Tupe a le Malo mo le Tausaga Faaletupe na faaiuina aso 30 Iuni 2020;
4. P.P.2022/2023 Nu.138, Lipoti a le Komiti o le Vaega Tau le Tamaoaiga i le Tulafono Tau Faaofi o Teuteuga o le Tulafono o Sootaga Va Lelei o Leipa ma Galuega 2023;
5. P.P.2022/2023 Nu.139, Lipoti a le Komiti o le Vaega Tau le Tamaoaiga i le S.R.2022/1, Tulafono Faatonutonu o le Pulega o Faiga Faiva (Gaosiga ma le Auina atu i Fafu o Oloa Tau I'a) 2022.

Ma le faaaloalo lau Afioga.

LAFO A LE KOMISI FAA-PALEMENE

FOFOGA FETALAI: Tulai mai lau Afioga i le Sui Taitaifono o le Komisi Faa-Palemene lau Afioga i le Sui Fofoga Fetalai.

Afioga AUUAPAAU MULIPOLA ALOITAFUA MULIPOLA (Sui Taitaifono o le Komisi Faa-Palemene): Lau Afioga i le Fofoga Fetalai ou te tulai e faatu le lafo, *Ina ia faamaonia e lenei Fono Aoa le Polokalame o Fonotaga mo le Tauaofiaga o lenei Tausaga 2023/2024 ua tuuina atu iinei e pei ona fautuaina e le Komisi Faa-Palemene.*

| <i>Masina</i> | <i>Aso</i> | <i>Masina</i> | <i>Aso</i> | <i>Masina</i> | <i>Aso</i> |
|---------------|------------|----------------|------------|---------------------|------------|
| <i>Mati</i> | <i>7</i> | <i>Aokuso</i> | <i>22</i> | <i>Ianuari 2024</i> | <i>23</i> |
| <i>Me</i> | <i>30</i> | <i>Oketopa</i> | <i>24</i> | | |
| <i>Iuni</i> | <i>20</i> | <i>Tesema</i> | <i>19</i> | | |

Lau Afioga i le Fofoga Fetalai, o le lafo lea.

Faaluaia e le Minisita mo le Soifua Maloloina ma le sui usufono mo Lefaga ma Faleaseela.

Na faamaonia le lafo.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2022/2023 – felafolafoaiga i luga o le faitauga
faalua**

FOFOGA FETALAI: E tusa ai ma Tulafono Tumau o le a faagasolo nei loa felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2022/2023.

O le avanoa leni o sui usufono e saunoa ai i Tulaga Lautele Tau Tupe ma le Tamaoiga o Samoa faapea Faiga Faavae Tau Tupe a le Malo. O le a ou toe faitau atu le vaega lea e taua mo tatou lauga, le faitauga faalua. O le avanoa leni o sui usufono e saunoa ai i Tulaga Lautele Tau Tupe ma le Tamaoiga o Samoa faapea Faiga Faavae Tau Tupe a le Malo.

Ou te faamanatu atu foi i sui usufono e le tautalagia i le taimi nei Mea Taitasi o le Tulafono Tau Faaofi. E faatoa saunoa i Mea Taitasi o le Tulafono Tau Faaofi i taimi o le iloiloga auiliili pe a maea felafolafoaiga i luga o le faitauga faalua.

E silafia foi e le tatou Maota, o le Tala Faatatau o Tupe Faaopoopo Muamua 2022/2023 ua na o ni nai faaopoopoga o le Tala Autu o Tupe o lo o faagasolo nei. O mataupu foi ua maea sausaunoa i ai lo tatou Maota i felafolafoaiga o le Tala Faatatau Autu o Tupe.

O le agaga o le Fofoga Fetalai, ina ne i toe afea foi i saunoaga ni mataupu ua maea ona saunoa i ai, ae o lo o ua i aao o le Faigamalo mataupu uma sa laga i le Tala Autu o le Tupe.

Na o se faamanatu mo le sologa lelei o le tatou galuega, ae le faapea o le a taotaomia ai avanoa mo a outou saunoaga, ina ne i avesese foi i se finagalo le fesoasoani atu a le Nofoa.

Ia o le avanoa leni mo se sui usufono muamua e fia sausaunoa i le tatou Tala Faatatau Faaopoopo o le tatou Tupe.

O lona uiga, ua leai lava ma se isi o manatu, o lea ua atoa uma mea uma.

Ia o lea ua matau atu e le Nofoa o lea e pei ua malilie uma le tatou Fono i le Tala Faatatau o le Tupe ia ma le Lipoti foi a le Taitaifono ma le Komiti.

Ia, tulai maia lau Afioga i le Minisita mo Faatoaga ma Faiga Faiva.

Susuga Hon LAAULI LEUATEA POLATAIVAO FOSI (Minisita mo Faatoaga ma Faiga Faiva): E le faaititia le agaga faafetai i le Atua i leni taeao fofu au Afioga i le Fofoga Fetalai i le alafai mai foi o le Palemene i le soifua laulelei ma le soifua manuia. E faatalofa atu ai i lau Afioga i le Fofoga Fetalai.

Ae ua ou tulai ona e matau atu ua goga le Maota. E i ai lava le tulaga e fesoasoani atu i lau galuega pe a faapea o le tulaga lea o le taeao ua tau faatutugata le tatou Palemene. Ae le aoaia e Laupua Tamafaiga. E i ai lava

le matau lau Afioga i le Fofoga Fetalai, ia o le Itu lenei o le Itu a le tatou Faigamalo e a ia le Tala o le Tupe e ave pea le faamuamua i le la Itu o le vai e sausaunoa ai i le tatou galuega. O le ala foi lea o le avatu pea o le faamuamua. Ae a faapea e leai, ia ua manaia tele le tuu atu loa o le fesili lau Afioga i le Fofoga Fetalai, ae tatou faagasolo. Ae na ona fesoasoani atu, ae o lea ua ou faapena atu, ae o lea ua ou maitau atu ia leaga o le aso muamua lenei, e faapena lava aso muamua e tau faatutugata, ae lava pea le onosai i lau Afioga i le Fofoga Fetalai.

FOFOGA FETALAI: Faafetai. Faafetai foi le fesoasoani mai i le Fofoga Fetalai, o lea lava e toa le Nofoa ma maitau atu, ia o avanoa lava e tatau lava ona tuu atu pea i lo outou mamalu.

Ia o lea ua maitau atu o lea ua fou mai le sa o Aleipata Itupa i Luga, ia malo faafetai. O le avanoa lenei o lau Afioga e te sausaunoa ai.

Afioga FUAAVA SULUIMALO AMATAGA (Aleipata Itupa i Luga): Ia ua faafetai atu i lau Afioga i le Fofoga Fetalai e tusa ai foi ma le avanoa. E talitonu foi o lea ua avea lava lau Afioga e fai ma o tatou sui o le ositaulaga e sii le viiga ma le faafetai i le Atua i lenei taeao fou, taeao sesegi aua le amatalia o Fonotaga a le Palemene i lenei tausaga fou 2023.

O le avanoa foi lenei e avatu ai se faafeiloaiga i le paia o le Maota nei, i le afio o lau Afioga i le Sui Palemia ma le vasega o Minisita, Minisita Lagolago, aemaise foi o le Sui Taitai ma le mamalu o sui usufono o lenei Itu e faafeiloai aloaia atu ai.

E faatalofa atu foi i le paia ma le mamalu o le faafofogaaga a Samoa, o lea ua uma ona e fofola le fala i tupu ma ee, aemaise le paia ma le mamalu o sa ma faigata, ia o le mamalu o si o tatou atunuu.

Ae o le a taumafai atu ia le sui usufono o lenei itumalo e amata atu le tatou Fonotaga, aua e vaai atu e pei e faatutugata le amataga o le tausaga fou ae le umi foi se manatu ma se faatauvaa e tuuina atu e tauala atu i luma o lau Afioga i le Fofoga Fetalai, e tusa ai foi o tulaga lautele o le tatou tamaoiga aemaise o faiga faavae i mea tau tupe o si o tatou Malo o Samoa.

Lau Afioga, ia, e amata atu ia se faamatalaga i le tulaga o le tatou soifua maloloina. Ia e momoli atu lava le agaga faafetai i le Afioga i le Minisita aemaise foi o le Ofisa Sili o Pulega ma le mamalu o le Pulega ma le Matagaluega i le auaunaga sa faatino e le gata i le tausaga ua mavae, aemaise foi o le tatou aulia mai ai o le amataga o lenei tausaga fou.

Faafetai o lea ua maua atu o lea e i ai nisi o tapenaga, nisi o atinae i le faaleleia lava o tulaga o falemai ma sa ou taua muamua foi ma ou faaoleole atu i le Afioga i le Minisita, o lea ua maua i luga o upega tafailagi aemaise o nusipepa, o lea sa toe faasalalau le tapenaga lea o tatou falemai fia faaleleia, e le gata i extension mo le toe faateleina lea o nofoaga o lo o agai i ai maitaga uma ma fai ai le service a le tatou Ministry of Health, ae

faapena foi le tulaga o apitaga mo fomai, residents ia e nonofo ai fomai i itumalo taitasi. Faafetai o lea e maua o lea e i ai le itumalo o Aleipata. E ui lava o Aleipata Itupa i Luga o lo o i ai le falemai i Lalomanu ae talitonu o le falemai lea o lo o service atoa ai Aleipata Itupa i Lalo, Aleipata Itupa i Luga, ia faasolo atu ai ia Lepa ma Lotofaga faapea foi nisi o vaega o Falealili o lo o taulalata mai.

Ae o le tatalo atu ma le agaga faaaloalo, lea sa taua foi i se tasi o fonotaga i le tausaga ua mavae, o lo o tagisa mai lava nai tama ma tina matutua i le tulaga lea sa tatalo atu ai, pe le faaaogaina le extension lea i sina vaega foi lea o sina masini aua lava le vaega lea o le faamamatoto, le dialysis foi lele mo i latou. O le tulaga o lo o i ai, o le toatele o latou e pei ua nonofo iinei i Apia i o latou aiga, ona o le taugata o le penisini e feoai ai, aua pe faatolu ona fai le faamama i le vaiaso. Ia o le alu lava ia i Aleipata, e \$100 lava e utu ai le taavale i le aso i le alu ma le toe foi mai. Ae pei o se faamama avega e tatalo atu ai. A mafai i le extension fou lea, ia tuu atu i ai se masini se tasi, ia atonu o lea ua fai le residence e nofo ai le fomai. Aua ou te vaai i le ata o le fale lea, ia pe tolu ea potumoe. A i ai ma se technician foi lele e fesoasoani i nurses i le faagaoioiga ma le tulaga o masini nei, ia ua taua tele lea, o se fiafiaga ma faagaetia ai foi nai tama ma tina matutua o si o matou itumalo, ia ma le tafa uma lea i sasae o Upolu, aua ou te iloa e aoga tele i ai, aemaise lava le tulaga o le tau mamao, tausavali mai i Apia nei, ae ua fai si taugata o le suauu ma le penisini i le feoaiga. O le isi mea, e manaomia e latou le auai i totonu o pulega a alii ma faipule, i le lauliliuina o le tofa ma le uta mamao i totonu o nuu, ae pei ua le mafai ona o lea ua faanofoesea i Apia nei ona o tulaga o maitaga ma tulaga faapena. Ia pei o le tulaga lea e avatu ai le tatalo i lau Afioga i le Minisita aemaise o le Matagaluega, ia se i silasila ane i ai i le tulaga lea.

Ona tatou oo mai lea i tulaga o tatou public servants faamolemole lava....

FOFOGA FETALAI: Ia, malie lava lau Afioga i le sui usufono mamalu se i tuu atu le avanoa i le Minisita mo le Soifua Maloloina.

Afioga Hon Valasi Luapitofanua Toogamaga Tafito Selesele: Lau Afioga i le Fofoga Fetalai, semeamanu lava e le i... Tasi lea sui usufono e ese le mataala, e to foi le pulou i le sui usufono. A faapea uma sui usufono, o le matua manaia lava o le Itu Agai, o le talanoa i mea anoa.

O le mea lea e saunoa ai le sui usufono, i le taimi lava na talosaga ai talu ai, ia ou talanoa loa i le vaega o lo o faagaoioia masini. Mo le silafia e lau Afioga i le sui usufono, e le o i ai se vaega o le Tala o le Tupe i lalo o le Soifua Maloloina, ae o le taua o le tali ma saunoa lautele. Ua uma ona talanoa i le Matagaluega o lea foi ua e silafia le sui usufono mamalu, aemaise le Palemene nei, faatoa faaulufale le tatou fale fou o fatugao i le

masina na tea nei i le aso 19. E manaia lava le nofoaga, ae fai mai foi nisi sui usufono e le o atoatoa.

O lau talosaga ia outou uma o sui usufono o le Maota, taumafai e i ai sou taimi e te asiasi ai i tatou meatotino ia ma silasila i le taua, aua ou te iloa o le tele o lenei Maota e agai uma lava i masini, ae pule le Atua i le soifua.

Lau Afioga i le Fofoga Fetalai, ua uma ona talanoa, manatua foi e le mafai ona soona avea se nofoa i tua po o se masini faapea e aunoa ma le sailiilia po o le suesue atili ma train lelei tagata e faatinoina, ne i meaane ua... o le manaoga ia e faigofie, ae faafetai i le sui usufono mamalu, o le taua ia o le talosaga.

O lea e faafetai atu ai i lau Afioga i le sui usufono, aemaise foi nisi o tatou... o nisi faasalalauga o tatou tenders nei, e taitasi lava kamupani. O le talosaga lea i le tenders board, faamolemole, ia silafia uma e Samoa ia taumafai e tuu mai talosaga po o ai lava e fia talosaga i le faaleleia o falemai a o le tele lava o mea, e taitasi lava. O le ala lea o le faasalalau i pepa ma TV e taumafai ina ia... E faafetai ai i le Taitaifono o le Board ma le Komiti Faafoe, a o le taua lea o le faamanino atu. E ui la ina leai se tupe o outou silasila ane i le Tala o le Tupe mo le soifua, o lo o lelei lava taumafaiga, o lo o faasoasoava lava seleni. A o le mea taua lea, atonu o le a silasila ane e leai se tupe a le Soifua Maloloina i le Tala o le Tupe, ona aua lea ne i toe lauga ai se isi. Ia manuia le Fono.

FOFOGA FETALAI: Ia, faafetai i lau Afioga i le Minisita, o lea ua saunoa manino, o lea foi ua faamalieina le sui usufono mamalu aua foi lana talosaga. Lau Afioga i le sui usufono mamalu.

Afioga FUAAVA SULUIMALO AMATAGA: Faafetai atu i lau Afioga i le Fofoga Fetalai. Ia e momoli atu foi le agaga faafetai i le Afioga i le Minisita ona o lea ua tafa se finagalo ma ua faapena foi ona tapena le Matagaluega. Ia pei o si mea lea ua ou vaai atu loa i le tatou Tala Faatatau Faaopoopo lea pei o lea e misi mai ae sa laga i le tausaga lea na tea, ia lea la ua faapea, toe faamanatu atu pea, aua le isi tatou Tala Faatatau Faaopoopo e faatatau i le faaiuga o lenei Tala Faaletupe ia Me po o Iuni.

Ia o lea ua e saunoa e le o i ai se seleni, ae ou te iloa atonu e sau le isi Tala Faaopoopo ua i ai sina vaega. Aua a matamata lava i le sitepu muamua ia faamuamua atu le itu lea i sasae e fai si taumamao, ua fai foi si maseese o le Mafa e sopo mai ai nai tuua e tau tulituli mai le falemai i Motootua.

Ae o le tulaga e pei ona e fofoga i ai, ia e faamalieina lou sui usufono i le tulaga lea e aoaoina lelei technicians, aemaise o i latou o lo o nafa ma le tulaga lea. Ia e taumafai foi e avatu se fesoasoani. Silafia foi sa ou auai i le task team lea sa setup ina le tatou dialysis unit lea i le 2005 a o Minisita Mulitalo, ma sa matou agai i ai i Sigapoa e study falemai i Sigapoa ma

omai loa setup ia mautinoa e mama lelei le suavai, ia lelei le tapenaga o mea uma ia, ia aua ne i i ai se mea e filogia ai le faatinoga o le faamamaina o le toto. Ma le agaga faaaloalo. A manaomia foi le fesoasoani ia ta talatalanoa ai atonu e fesoasoani foi i le tofa a lau Afioga ma le Matagaluega aua le sailiiliga o nisi, aemaise lava a i ai nisi o le matou foi itumalo o lo o i ai se silafia o galulue i totonu o le Matagaluega, ia atonu o le taimi lelei lea e post ai i tua ma feiloai ai ma aiga ma feiloai ma nuu ma tulaga faapea. Ia e momoli atu le agaga faafetai.

Ou see mai lea i le tulaga o tatou public servants faamolemole. O lea e maua ua i ai nisi o faasalalaua i circular, ua i ai nisi o tulaga ua le faaogaina nisi o vacancies po o se tulaga foi lele ua i ai se tulaga ua le o toe i ai nisi e replace ina nisi o post ua already established. Ia ma e fesiligia e lou sui usufono po o i ai se mafuaaga tele, ona o le taimi nei o lea foi e tausaili galuega, ma ou te iloa foi o le mea lea ua tafe ai le tele o aufaigaluega i a tatou galuega ia faavaitaimi, RSE ma tulaga foi lele faapena. A o lea e matau atu, po o se tulaga tau seleni ua faaetonu ai le tulaga o le cash flow aemaise e avatu ai se faamatalaga, e leaga o lea ua toe maua ma faamaonia, sa tatou pasia i le tulaga lea ua tuana'i, ia le tulaga lea o fetuunaiga o le Pulega o Uafu ma le tatou Samoa Shipping Cooperation. E i ai tagata o lou itumalo o le Itupa i Luga ma le Itupa i Lalo sa galulue i le uafu i Aleipata, ma sa nonofo ai foi i tua, o le taimi lenei ua leai ma se isi o toe faigaluega. Ae pei o le tulaga lea sa lagalaga atua i finagalo o lenei Itu, po o a aafiaga o le fesuiaga lea. Lea foi sa i ai le lagolago ona o le tulaga na taua, e leai se isi e aafia, e na ona fesui ai lava o le Pulega ma tulaga uma faapena, fesui ai tulaga o aseta ma meatotino, a o tagata faigaluega e tumau. Ou te iloa o lea atonu e silafia e lou uso sui usufono mai le Itupa i Lalo, ua i ai nisi o tamalii foi, o alo ma fanau e le o toe, a o le upu, fai mai se i uma logo atu, ae ua le toe totogi le toe faigaluega, ona i ai lea o le atugaluga. O lea atugaluga, ona o le tulaga o se tasi o aseta i Aleipata i le uafu, e pei ua taatia i se tulaga ua le toe ano i ai, ona ua leai ni tagata faigaluega. Ia faamolemole se i silasila ane i ai i le tulaga lea le toe faafaigaluegaina o alo ma fanau, o si o matou itumalo. Ona o lea na agiga lava i tatou felafolafoaiga e leai se aafiaga o tagata faigaluega. Ma o le tulaga lena e tatalo atu ai, faamolemole.

O le isi tulaga o le tulaga lea, o lo o vaavaaia pea i luga o le media aemaise social media, o lo o faapena ona fevesiai ai i nisi foi o seleni o lo o manaomia o lo o faapea e aumai e fai ai le tamaoaiga o Samoa. O lea faatoa ou tau nei i ai ma ou taumafai e maua ai foi se malamalamaaga, ona o mea nei e tele lava o social media e tele ina agai i ai, e le o tele tele se coverage mai le tatou main media outlets. O le tulaga lea o laga ona o tupe ia e faapea o carbon credits. Atonu o se tulaga ua lagalaga ona o seleni e maua mai i lea vaega, atonu e fesoasoani i le tatou tamaoaiga. Ma o lo o i ai ni tuuaiga e ova ma le \$1.5 piliona se tupe ua faapea ua oo mai, e le o

iloa po o fea ua tafea i ai. Ma o le tulaga lea e avatu ai se leo o lenei itumalo faamolemole, e oo foi i lou tagata sa galue i le Matagaluega sa nafa ma tulaga ia, e lei i ai leai se mea faapea na faia. E eseese carbon credits, ese fund na set i lalo o UNFCCC po o le Secretariat lea e talanoa ai le climate change, lea e i ai le GIF ma tulaga faapena.

FOFOGA FETALAI: Ou te faamalulu i le sui mamalu, o le a avatu se fesoasoani a le Nofoa i tulaga ia, ona o lea e matau atu o lea ua tatou talanoa i isi vaega ia, e faaleolava i ai le silafia o le tatou Maota. O le mea sili o lea ua pai i ai lau saunoaga, ae o le auiliiliga atonu e i ai se taimi tatou pai uma i ai i ia mea. Ae ua i ai le fautuaga a le Nofoa, tatou mataitu pea ma vaavaai pea mo le agai i luma, ina ne i te i ua tatai outou finagalo i le social media, te i ua tatou oo atua i saunoaga i nisi tulaga, ae le o malamalama le toatele o le tatou Maota nei. O lea e faamalulu atu i le sui usufono, o le mea sili lea ua pai i ai lau saunoaga, ae manatu e lelei lava le tatou agai i mea i le tatou Maota ma tatou malamalama atili ai. Ma le agaga faaloalo, tulai mai le sui usufono mamalu.

Afioga FUAAVA SULUIMALO AMATAGA: Ua faafetai atu i lau Afioga i le Fofoga Fetalai e tusa ma tulaga ia, ae ona o se vaivaiga o lou sui usufono, o se mea ua taavilivili ua faapena ona aumai ai finagalo o tagata, ma ua oo mai foi ia te au, pei o se mea lea na manao pea e faaleo atu aemaise o au le isi tagata e aafia tele ai, aemaise foi o le Afioga i le Palemia, ona o matou lea sa galulue ai i tulaga ia. Ona e le o i ai foi se finagalo po o se faaliga mai le Afioga i le Palemia, a o si au na ia taumafai atu, ona o tulaga e aafia ai o matou tagata. Ae ua taua o ni tupe ua faaleiloa po o ni tupe gaoi, o lona uiga o au le isi sa gaoi ai i tupe nei. E pei o le tulaga lena lau Afioga, e na ona faaleo atu faapea, ae le i tupu se mea faapea. O le tulaga foi i le atunuu o Iapani, sa matou galulue e sue se baseline, lea na mafua ai nisi o lipoti. E tautatai i ai, pe fia se tupe a Samoa e maua mai i le kaponi. Ia o lea ua i ai faamaumauga e fua i ai, ae ou te iloa e tele lava auala e savalia, e fono le lalolagi le UNFCCC, o i ina e set up mai ai le process.

FOFOGA FETALAI: Ia malie lau Afioga i le sui usufono mamalu, ona o lea e matau atu o lea lava e te... O lea e matau lelei lava e le Nofoa sa e galue ai, ae pei ona avatu le tala a le Nofoa, tatou faaeteete i mea ia, se i malamalama atili le tatou Maota, aemaise o se tulaga o suesuega o nei mea po o le a le sao. Ae o lea ou te malamalama lelei sa e galue ai, o le ala lea o le vave ona ou pai atu. Ae se i tulai lau Afioga i le Sui Palemia, o i ai se mea o e fia saunoa ai.

Afioga Hon Tuala Tevaga Iosefo Ponifasio (Sui Palemia): O lea tonu lava lau Afioga i le Fofoga Fetalai, faafetai mo le avanoa. E muai faatalofa ma faatulou atu foi i le Palemene mamalu o Samoa. Lau Afioga o lea ua e saunoa tonu lava i le mea sa tau avatu ai le fesoasoani i le Nofoa. Ona o lea e foliga mai o le a alualu ai pea le saunoaga a le sui usufono ma taua ai pea le Tamaitai Palemia e le o auai mai. E pei o le tulaga lea ua ou tulai atu ai, ina ia taumafai e... e lelei lava le saunoa mai i ni faamaumauga ua fola i luma o le Palemene, faapea ni faamaumauga ua i ai ni faamaoniaga. Ae o le talanoa mai luga o le social media faamolemole, e teena e lou sui usufono. O lea foi ua taua tulaga faapea, atonu na gaoi ai latou po o ni tuuaiga lau Afioga, e faamalulu atu, aua le taua fua le suafa o le Tamaitai Palemia i le tulaga lea ona e le o auai mai. O le tuualalo lea i lau Afioga, ina ia see atu le sui usufono i se isi itu e faaauau ai lana saunoaga, ae taatia loa lea mataupu ma le faaaloalo lava.

FOFOGA FETALAI: Faafetai o lea ua maua lou finagalo, o le ala foi lea o lea sa taumafai atu

Tofa Hon Lauofo Fonotoe Nuafesili Pierre Lauofo (Anoamaa 2): Lau Afioga i le Fofoga Fetalai....

FOFOGA FETALAI: Onosai mai lau Afioga i le Sui Taitai se i fai atu le tala a le Nofoa. Onosai mai.

O le ala lava lea, ou te faamamafa atu le tulaga lea, ou te musu tatou te fefaloai ma tautau nisi e le o i inei i le Maota. E pei o itu na e faaeteete lava le Nofoa i le tulaga lea. O lea ua tatou malamalama ma faalogoina, a o le uiga lea o le tatou Maota nei, se i tatou vaai i ni mea faitino ma ni mau e aumai i luma o le Maota, ona mafai lea ona oooo i ai a tatou saunoaga. E pei lava ona ou fai atu, o lea ua uma ona e pai i ai, o lea ua malamalama o lea foi ua i ai lou finagalo. Ae o le uiga lena, leaga o lea sa galue ai, o le itu lena o lea e popole ai le Nofoa. E manatu, e tataua ona faagata i i le talanoaina o lea lea tulaga ma lea vaega, ona o le a tatou see atu ai i isi tulaga ma oo atu ai le tatou fonotaga i nisi...o lea ua saunoa manino le Sui Palemia, ia oautou alofagia foi le talosaga a le Sui Palemia lea ua i luma o le Maota. Ma le agaga faaaloalo. Tulai mai le sui usufono mamalu.

Afioga FUAAVA SULUIMALO AMATAGA: Ia faafetai i lau Afioga, e faamalulu atu i tulaga foi e pei, atonu ua seetia foi ona e pei o ni lagona e pei ona avatu, e aafia lou tagata. E faamalulu atu ona o le taua o le suafa o le Tamaitai Palemia. E le faapea e avatu se faamatalaga o tuuaia le Tamaitai Palemia, e leai. O le tulaga e pei o matou sa galulue faatasi i ia tulaga. E pei ona avatu foi se faamatalaga i fonotaga ua tuanai, sa faapea foi ona tuuaia ia lenei lava Sector ma le Matagaluega i mea tau fanua. O

lea sa afio mai lava le Tamaitai Palemia, e le o i ai ni tulaga faapena. O le a ou see ese i le tulaga lea lau Afioga.

Ona tatou agai mai lea i le tulaga lea o tatou securities, o tatou malo. O lou iloa e le o po foi se lilo lea foi ua i luga o tala fou ma nusipepa, i se tasi foi o mataupu na tulai mai i le vaiaso ua tuanai. E i ai lou talitonuga, o se mea na tulai i totonu o nisi o Ofisa o le Malo, i le mea lea sa tulai mai i le susuga ia Tuilaepa na nisi foi o tina. O le a ou le taua nisi o tulaga, ae pau na o le tulaga e avatu ai se tuualalo, o le aafiaga o tatou tagata aloaia i le tulaga foi lea pei o le a faatasina ma leai se saogalemu aua tulaga o mea nei, o lo o i ai lava le tulaga e puipuia lo latou soifua ma lo latou saogalemu, e faatino lea e malu o le Malo, e malu ai lo tatou Malo, i susuga foi i leoleo ma tulaga faapea.

E pei e tau agai se faamatalaga ona o lea tatou te tapena ona o le tausaga fou e tali malo ai Samoa i taitai o le lalolagi, aemaise le vaega lea o le Commonwealth. A faapea e alu atu i fafo le tala lea, ou te iloa e mea ma oo i se tulaga popole. E faapefea ona faamaonia le security po o le saogalemu o Taitai o isi atunuu pe a omai i Samoa, pe a faapea e oo lava i Taitai o Samoa, e le o mafai ona saogalemu i tulaga ia. E na o se tuualalo ma se faamaite, ia taatia atu i ina i se tofa ma se finagalo o le tatou faigamalo.

Ona ou oo mai lea i le tulaga o le tatou Supplementary lea e vaavaai atu ai, o lea e i ai se tulaga foi lea e siitia i le tai \$50, e pei o se siitaga foi lea i le tatou pension ma vaega lea e lavea i manaoga faapitoa. E pei e vaai atu i le ata pei na o se tolu masina, e a le mea e manaia lava le faaauau i tulaga faapena. Ma le agaga faaaloalo.

Afioga Fepuleai Faasavalu Faimata Sua (Salega 1): Lau Afioga i le Fofoga Fetalai.

FOFOGA FETALAI: Se i tulai mai lava le sui usufono mo Salega.

Afioga Fepuleai Faasavalu Faimata Sua: E talu ai ona o lea ua oo le saunoaga a le sui usufono i le Matagaluega o Leoleo, ae le o nofoia foi le Nofoa e le tama o le Matagaluega, ae ona o tulaga o le puipuiga. E faamalulu atu i le sui usufono, o lo o lelei lava le faatinoina o galuega a le Matagaluega - malu o le Malo, puipuiga o le saogalemu ma vaega uma. Ae talu ai o le mea lea na tupu lea e tau faailoa mai, e le o aafia i totonu o le Tala o le Tupe. E na ona fesoasoani atu, e le mafai e malu o le malo ona galulue e tofu le malu o le malo ma le tagata e toatasi o Samoa, e le o lava malu o le malo, a o le puipuiga o lo o 100% le puipuiga ma le faatinoga. Ae ona e le talanoa se isi ma mea tutupu, ma se mafaufau o se tina ma se tama po o se isi lava e faaoo se tulaga faapea. Na ona fesoasoani atu, o lo o malu lava le galuega a le Matagaluega.

FOFOGA FETALAI: O le saunoaga a le sui usufono mamalu latou ia, o lea e faalauaitele ina ia silasila i ai le Matagaluega mo le agai i luma. O le uiga lea o le saunoaga faalauaitele a le sui usufono mamalu, ina ia lagonaina foi e le Matagaluega tulaga o puipuiga faapea. Ae le o faapea o afaina ai le Matagaluega i le latou Tala Faaopoopo o le Tupe. E manatua foi o le avanoa lenei e saunoa faalauaitele ai le sui usufono i le tamaoaiga o le atunuu ia ma nisi mea aoga mo le atunuu. Lau Afioga i le sui usufono faauma maia lau saunoaga ua uma lou taimi.

Afioga FUAAVA SULUIMALO AMATAGA: Faafetai, o lea ua e faamanino i le sui usufono sa tulai mai le tulaga lea. Ia e eseese lava mea, e le faapea e tofua le tagata ma le leoleo, e i ai e taualoa ma tulaga faapena e ave i ai le faamuamua. A agai mai foi tatou malo mai fafo, e tatau foi ona ave i ai le tatou faamuamua. E pei o le atugaluga lena sa avatu ai se manatu, ae moni e le o i totonu o le Tala o le Tupe, ae ona o lauga faalauaitele o le tatou tamaoaiga. Lau Afioga ona o lea ua uma lou taimi, ae pau lena o se tatalo i tulaga na o le siitaga lea, ae manaia... o lea ou te vaai atu pe na o le tolu masina, e a pe a faaauau atu i lenei vaitaimi o le taugata o le soifuaga, e siitia ai i luga le tulaga o le penisione.

FOFOGA FETALAI: Malie le sui usufono mamalu, se i tulai mai le Sui usufono mo Anoamaa.

Afioga Alaiasa Moefaauouo Malagaitutogiai Sepulona Moananu (Anoamaa Sasae): Lau Afioga na o se mea e fia faasao. E pei lava ua ou faalogologo i lenei taeao e pei ua tau siisii mai le itu lea e manaia le saunoaga a sui, a o lea la e saunoa e le o i ai i le Tala o le Tupe... na ona faamalamalama atu, o le totogi o le leoleo la e i totonu o le Tala o le Tupe. Ma le agaga faaaloalo.

FOFOGA FETALAI: O lea ua uma ona pai le tala i le sui usufono mamalu sa tulai mai. O lea foi ua faailoa i ai, o lea ua aafia i lauga faalauaitele lea e aafia ai ma leoleo, la e totogi i le Tala o le tupe, lena e sao oe. Tulai mai le sui usufono mamalu e faamaea mai lau saunoaga.

Afioga FUAAVA SULUIMALO AMATAGA: Faafetai i lau Afioga. Ou te iloa e feololo lava nai mea ia e tusitusi i i, ae ou te iloa ona o au lea ua tomua, ou te iloa foi o le a laga e nisi o sui usufono, ae ona o le manumanu i le taimi aemaise o lea ua faatonu mai e lau afioga le tulaga ua maea lou taimi. Ae o se avanoa lea e momoli atu ai le agaga faafetai i lau Afioga, e faapena foi ona faamalulu atu foi i le paia o le Maota, a i ai se upu ua laaloa pe ua le tau tamalii foi i lau faafofoga, o le taumafaiga lava a

le sui o Aleipata Itupa i Luga, e avatu so matou leo, e fesoasoani foi i le Tala Faatatau Faaopoopo o le Tupe aemaise le taumafaiga o le tamaoaiga o le tatou atunuu.

O le avanoa foi lenei e avatu ai le agaga faafetai i si ou itumalo o Aleipata Itupa i Luga i sa outou faafofoga mai, o le a se vaivai o le sui usufono, ua pau o se mea ua taumafai i ai, ua foi mai ma tuuina mai e le Agaga o le Atua ua mafai ona faaleo i lenei taeao. Ia manuia tele le faafofogaaga a Samoa, aemaise o si ou itumalo, manuia lau Afioga i le Taitai o le tatou Maota aemaise foi le paia o le Maota Fono. Soifua.

FOFOGA FETALAI: Malo faafetai le faasoia i lau Afioga i le Sui usufono mamalu mo Aleipata Itupa i Luga. Faafetai o lea foi ua faamaumau uma tulaga e pei ona laga i lau saunoaga faalauaitete. Malo le faasoia, malo foi le fesoasoani i le tatou malo ma ana galuega fai. O le avanoa lenei i se tasi o sui usufono mamalu. Ua ou vaai atu lea ua fou mai le... Anoamaa Numera 1... e leai o lea ua... Tulai mai le sui usufono mamalu mai Faasaleleaga Nu 5. Lau Afioga Peseta lou avanoa lenei.

Afioga PESETA VAIFOU TEVAGAENA (Faasaleleaga 5): E muamua ona ou faatalofa atu i le paia maualuga o lenei taeao, i tulaga faalupe foi o le Maota. Afio ai lau Afioga i le Fofoga Fetalai, e ui lava ina tatou le faatasi ma le Afioga i le Tamaitai Palemia faapea nisi o Minisita o le Kapeneta. Ia tuu atu ia i luma o le Atua le tatalo a lenei itumalo. E ui lava ina feagai le Tamaitai Palemia ma nisi o Minisita i nisi o togafitiga ona o le le atoatoa o le tino, ae tatalo i le Atua ina ia toe faafoi le malosi, se taimi foi tatou toe feiloai aua foi le faatinoina o feau ma galuega aemaise le tautuaina o si o tatou Malo.

E faatalofa atu foi i lau Afioga i le Sui Palemia, le mamalu o le Kapeneta, faapea foi lenei Itu i le afio a lau Afioga i le Sui Taitai, le mamalu foi o lenei Itu po o lenei foi Talaga. Avea foi lenei avanoa e faatalofa atu ai i lau Afioga i le Tamaitai Loia Sili, aemaise o Ofisa Sili o Pulega o Matagaluega. E faatalofa atu foi i nisi o tamalii, Ofisa sili o Pulega fou o tatou Matagaluega a si o tatou Malo, lea ua tatou fono faatasi i lenei taeao. e faapea foi i le Matagaluega o le Fono, le lua vaa seelua, e faatalofa atu lou nei sui usufono.

Le tapuaiga a Le Ao Mamalu o si o tatou Malo ma lau Masiofo, faapea foi le afio a lau Afioga a le Sui o le Fono a Sui Tofia, le Peresetene o le Faamasinoga o Fanua ma Suafa, le Afioga i le Faamasino Sili, faapea le mamalu o Alii ma Tamaitai Faamasino a le Matagaluega o Faamasinoga.

Ae a le tapuaiga a si o tatou atunuu, e aveia foi lenei avanoa e momoli atu ai le agaga faafetai i si ou itumalo, faamalo tapuai, faamalo tatalo. O lea ua tatou aulia mai lenei tausaga fou, tatou tuu i luma o le Atua le faamoemoe o lenei tausaga.

Ae le i molimoli atu se sao o lenei itumalo, ou te faatalofa atu i le aiga Sa Levi, auauna o le Talalelei, e tatalo pea i le ao ma le po ia maua pea le soifua laulelei i auauna uma e le gata i si o tatou atunuu, ae faapea foi atunuu mamao o lo o alala ai ma taputapu mai.

Lau Afioga i le Fofoga Fetalai, o le a le agai tele i tua le lauga a lenei itumalo, ae agai atu pea i mea o lo o manaomia i lenei taimi, ma nisi o vaega e fia malamalama ai lou sui usufono, ona o tulaga ua i ai le tamaoaiga aemaise le Tala o le Tupe.

Ou te fia fesiligia muamua lau Afioga i le Minisita o Tupe, e momoli lava lau faafetai mo le lipoti lea ua faataatia, e ui lava e le o se tala o se tupe tele, ae tele lava foi mafaufauga e tulai mai ai. Ona o lea pei sa matau atu i lau folasaga i nisi o vaegatupe a si o tatou atunuu o lea ua faasafua. E pei ona matau atu i le \$500,000 lea ua tuuina atu mo le Victim Support. Ona faafesili atu lava lea i lau Afioga i le Tamaitai Minisita, e faapefea ona account ia tupe nei? Aua e pei e foliga mai o le Victim Support e le o i lalo o se Matagaluega a lo Malo, o se Faalapotopotoga. O lea la ou te fesili atu, pe faapefea ona taunuuina mai ia ni faamaumauga o ia tupe i lona faauluina? E pei e tasi lea fesili o lo o manatu ai lou sui usufono, e lelei pea lou fesiligia o lau afioga, e leaga o lea ua faaoga tupe a lo tatou atunuu. O se faaiuga lelei, ae lelei lava le mautinoa, ina ia taoto i se taotoga lelei ia mea o lo o faaalu ai tupe a si o tatou atunuu. E momoli foi lau faafetai i lau Afioga i le Minisita, i lau faasoa lea na e saunoa mai, o le a sii le tai \$50 i penisione, faapoopo i luga o penisione. Lea o lo o maua nei e tatou tagata matutua e tai \$200. A o lea la o le a sii nei i le \$250. Lau Afioga o lau tatalo, afai o lea ua manaia lea faasoa, aua o lea pei ona taua foi e se tasi o sui usufono faatoa mavae atu nei le tulaga lea, pe lua ea pe tolu masina lea na e saunoa ai, o lau lava tatalo, pe a pe a alualu ai pea, ae aua le tuua na o se lua masina. Afai lava o lea ua e manatu o le a faasoa faasafua mo nai o tatou tuua matutua, e manaia ae alu ai loa i le \$200 pe tuu loa i le \$300 lea sa outou folafolaina foi i le taimi o faiga palota. Ioe, ona matagofie lea. Ou te lagona e leai se isi o lenei Maota e teena le tulaga lea.

FOFOGA FETALAI. Ou te faamalie atu i le sui usufono mamalu se i tulai mai le Afioga i le Minisita o Faatoaga ma Faiga Faiva.

Susuga Hon Laauli Leuatea Polataivao Fosi: E lelei lava le fai ma faasaosao a tatou saunoaga. I le faafofoga mai a le atunuu, o le tasi lea sui usufono ua fai soo pea le mea lea, i le tuuaiga lava lea. Ua lelea uma i le lalolagi ma upega o faamatalaga, o le finagalo lena na i ai le itu lenei. Peseta e leai. O lena e te silafia lelei, na omai le Faigamalo i totonu e na o le \$150, e \$150 na i ai i le penisione a tagata matutua. O le matou tala, a taunuu mai e \$200 e amata ai. E matuai leai ma se taimi, tulou lava leaga o au sa faia le upu. E leai se taimi na ou taua ai le \$300 ae tala faalua. O lea

la o le a ou toe avatua le faasaoga lena, ua faafia ona fai le upu lena i totonu o le Palemene. E le i i ai se taimi na faapea ai e \$300 ae tala faalua. E ese le vaega faaupufai lena e leai ma sona sui na tu mai na faia le upu lena. Ae e tataua ona faasao le mataupu lea lau afioga, e leai se taimi na taua ai i nai a matou faasilasilaga, e \$300 ae tala faalua.

A tatou o nei la ou te avatu le faamatalaga e aumai mea manino ma mea faamaoni, ia o le agaga lena, ae leai se taimi Peseta. O le mea foi lea tou te saunoa mai ai, i le faaauau pea, a mea o le auga lena o faigamea. A o le a le mea lea ua aumai ua tatou gafataulimaina i le taimi lenei, fai lena mo tatou, o lea ua faaopoopo le tai tolu masina, faaopoopo le tai \$50. A o le mea lena lau Afioga i le Fofoga Fetalai, e fia faasao le saunoaga a le sui usufono, e leai se matou folafolaga faapea na fai, e tai \$300 ma tala faalua. Ma le agaga faaaloalo.

FOFOGA FETALAI: Ou te iloa o lea ua manino sui usufono mamalu, ou te iloa e le o le faatoa faamalamalama e le Itu lea le tulaga lea, e tataua lava ona tatou o pea i faamaumauga ma folafolaga foi i luma o le tatou Maota. Ua uma ona faamalamalama nei tulaga, aemaise lava le Minisita o Faatoaga ma Faiga Faiva e ana ia le upu. Ou te talitonu foi, e le tataua foi ona tatou toe oo i ia mea. Ua uma ona faamalamalama i luma o le Maota, e le mafai ona toe sau faalua. Se i tulai mai mai lauoga i le Minisita o Galuega Tetele.

Tofa Hon Olo Fiti Afoa Vaai (Matagaluega o Galuega, Fealuaiga ma Atinae Eseese): Lau Afioga i le Fofoga Fetalai faafetai mo le avanoa. E na o se tuualalo ona o le tau sefe o le tatou taimi. E a pe a tuu ia le sui o Faasaleleaga 4, e alu ai pea le malamalama faapela. Ua tolu paeaiga ua e i ai, e le malamalama, e fiu foi e faamalamalama, e a pe a tuu ia e alu le malamalama, o lea ua tatou iloa e fai le malamalama a na mea. Ma le faaaloalo.

FOFOGA FETALAI: Lau Afioga foi o le sui matua o le Maota, e talitonu foi, faamatua mai lau saunoaga lau afioga i le sui mamalu.

Afioga PESETA VAIFOU TEVAGAENA: Lau Afioga i le Fofoga Fetalai, e momoli lava lau faafetai i Minisita ia e toa lua, e mataala, e matauupu. Ae leai sau tala e tala faalua, a o lea ua saunoa mai le Minisita o Faatoaga ua ou fai atu e tala faalua, o si mea e fia faasao. O le uiga o lau faamatalaga lea e avatu, o lau faafetai i le Minisita o Tupe i le manaia o lana faasoa. Ona ou manatua ai lea o le pese palagi, le pese lotu i taeao uma lava. Le pese lea e ta loa, ou fai atu i le matou aiga, e ki i luga le laau, a o le pese lea toetiiti lava.o le ala foi lea e le galo ia au lea pese, leaga e sau lava i taeao uma. O le mea lea e usu e le teine lea o Michelle

Williams, Kelly Rowlands ma le tatou teine foi lele o Beyonce. O le pese lotu lea, when Jesus say yes, nobody can say no. O le mea la lea lau afioga i le Minisita o Tupe, e leai ma se isi o le atunuu lenei e teena lou finagalo i lau faasoa. O le mea lea ou te tatalo atu ai, sii i luga o le \$300 ae tatou alu ai lava mo nai o tatou tagata matutua. Ae aua le lava na o le lua masina, tolu masina. O le uiga lena o le mea lea ou te tau fesoasoani atu ai i lau afioga. Ia talu ai ona o lea e le i afio mai le afioga i le Minsiita o Vaalele, ae o le mea sili o lea e afio mai le Minisita o Galuega, aua e pei o laua ia e ona le vaalele lea e tau aumai. Silasila foi lau Afioga i le Minisita, tele o faafitauli o lo o feagai nei ma le atunuu, i le taugata lava o pasese. O le taimi lenei o le Kirisimasi malaga nei i le tausaga fou, o lau tuualalo, po o le a le tonu o le tatou vaalele. Ae aumai se tatou vaalele, aumai le tatou vaalele. Leaga o lea na ou tilotilo atu i le social media, o le toatele o le mamalu o le atunuu ua tele ina taoto mai i totonu o malaevaalele i Aukilani ua leai ni vaa. Ae pei o le agaga lena e tuu atu ai lau tuualalo i lau Afioga i le Minisita se i toe silasila ane lava. Ua tataua ona aumai se tatou vaa e fesoasoani i le feagai ai o le tatou atunuu leaga e tasi lenei atunuu e malaga soo o mea a nei o faalavelave. Ioe, o mea a nei o faalavelave pei o le tulaga e avatu ai lau tuualalo i lau Afioga se i toe silasila ifo lava i le tulaga lena.

Ona oo mai lea lau Afioga i le Sui Palemia...

FOFOGA FETALAI: Malie lau afioga i le sui usufono mamalu se i tuu atu le avanoa i le Minisita o Galuega Tetele leaga o lea sa taua i lau saunoaga.

Tofa Hon Olo Fiti Afoa Vaai: Ou te faamalulu atu i lau afioga ona ua i ai le Minisita ua uma ona tofia e tulai mo le afioga i le Minisita o lo o sii gasegase, ae ona o lea ua fesili tonu mai ia te au se i ou tali muamua atu ia i le mea lea sa faapea sa tofafa ai nisi i le malaevaalele. O le mea tonu lava afai e te malaga e te transit e fua lelei lava lau booking ia e alu atu pe tasi le itula e te agai ai i le isi flight. Ae pei o si vaega lea sa latou silafia lava e fai si umi pe 4 ea pe 5 itula, ia o le mea foi ia e tatou iloa foi la foi e silafia e leai ni moega i totonu o terminals e o atu ai ma tofafa ai, vagana ai nofoa ia faapena foi nisi o malaevaalele o lo o i ai tulaga faapena e totogi. Atonu o lena sa outou silasila i ai ma le isi mea e le o i inei na tupu ai lena mea. E pule lava Niu Sila i le latou faiga e fai ai lo latou malaevaalele po o i ai ni tulaga faapena e malolo ai pasese ma toe agai atu ai i nisi o atunuu.

Ae o le tulaga lea faapea o le taugata o pasese i se vaalele ua leai se vaalele. Peseta, a e matauina le kerisimasi nei ma aso ia o le matuai tagatā ua e silasila i ai i le pauu mai o le mea o le vaalele, Quantas, o le Fiji Airways, o le Air New Zealand o le tele o le vaalele, a ua molimauina ai foi le tulaga pau o pasese i le agai mai o le mamalu o le atunuu. Po o Mati

nei e taunuu mai ai le Virgin e faamatala atu ai le mea lea sa amata mai le latou schedule i le 737 laitiiti le aofaiga o pasese ia. O lea foi ua toe tatalo mai e tuu atu i le 777 le vaa tele ua le mafai, ua le gafatia e le vaa laitiiti ona aumai le mamalu o le atunuu i le taugofie o le pasese lea ua amata i le tai 600 return.

O le tala lenei mo le mea o le manaia o le tele o vaalele lea foi la ua maua mai ua aumai le finagalo i le Fiji Airways e i ai foi le latou special e amata nei ia Fepuari, ia o le ituaiga pasese lava lenei. O le mea lenei na misi na e sa e saofai i tua o le Palemia i lenei taimi ae te le fautua i ai i le mea lea ua fai i le taimi lenei, i mea e pau ai pasese ae nao lou soiso'i foi lele pe a fai mai ana mea, ae pei o le faamalalamaga lenei. Aua e te popole i le tulaga lenei toetiti a ona tatou vaai atu foi lea i le tapenaga a le Minisita, le iloa po o le mea lea o loo agai ai i Niu Sila o le tapenaga mai o ni tatou vaalele. Ae ou te iloa a iloga pe le na o se tasi le iloa pe lua, tolu, fa.

O le faamalalamaga lenei lau afioga i le sui usufono mamalu.

FOFOGA FETALAI: Ia ou te iloa lau afioga i le sui usufono mamalu se i fai atu pea se tala a le Nofoa, ua uma foi ona fai atu se tala a le nofoa i lea mataupu. O lea ua outou faafofoga foi ua uma ona saunoa le Minisita ma le faigamalo i a latou foi faiga faavae i lenei taimi.

O le tatalo a le Nofoa, ia tatou tatalo faatasi ma tatou faamoemoe i le Atua ia manuia nei faamanuia uma, ae o le toe laga mai o se mea ua uma ona tatou talanoa iai, o le agaga lenei o le Nofoa. Ae faafetai foi le taugologolo lea ua maua atu o lua fetuunaiga a ma le Minisita i le tele o taimi ma lua talanoa a o lea lava e matau atu e le o mautu lava se fuafuaga a oulula ma lau afioga i le sui usufono mamalu.

Tulai mai le sui usufono mamalu e faauma lau saunoaga.

Afioga PESETA VAIFOU TEVAGAENA: Faafetai i lau afioga le Fofoga Fetalai. E pei o le mitamitaga o lou nei sui usufono i se tulaga matautia ua oo i ai le au a si o tatou atunuu le Toa Samoa, o lagona la na oo mai ia te au, maimau e pe ana i ai se tatou vaalele e faasalalau atu ai i le lalolagi le vaa lava o si o tatou atunuu e molimoli atu ai lana au e pele ia te ia. Aua o lagona na sa oo mai ia te au, maimau e, meamanu e lele mai lava tumutumu lo tatou atunuu. Ae soia ia o lea ua saunoa lau afioga o lea o le a fai le vaalele.

FOFOGA FETALAI: Se i tulai mai lau afioga i le Minisita.

Tofa Hon Olo Fiti Afoa Vaai: E manaia le saunoaga, manaia le finagalo o le sui usufono, 30 tausaga o lea lava e talanoa i le mea lea. Maimau pe ana i ai se vaalele, le faaletonu, faatamala le tapenaga mai le 30 tausaga lau afioga i le Fofoga Fetalai. Ia a o lea na o le 10 ma ona tupu masina ia o lea

Ia e taumafai atu a ua leva na e nofo i tua o le toeaia lēna ae e te le fai ai i se vaalele, ae aumai foi le vaalele e pei o se vaalele foi lea e ave na o le au lakapi ae le run faapisinisi e maua ai se tupe. Onosai.

FOFOGA FETALAI: Ua i ai le manatu o le Nofoa e faauma ia i i lea vaega ma tatou talanoa i le vaalele.

Afioga Hon Lautafi Fio Selafi Purcell: Lau Afioga i le Fofoga Fetalai e fia maua lava sina avanoa.

FOFOGA FETALAI: O le sui usufono mamalu o fea e fia agai ai le saunoaga?

Afioga Hon Lautafi Fio Selafi Purcell: Agai i le Afioga i le Minisita.

FOFOGA FETALAI: E le faatagaina.

Afioga Hon Lautafi Fio Selafi Purcell: Leai ou te fia faauilavea e ui atu ia Peseta, faui atu ii.

FOFOGA FETALAI: E te faauilavea ia Peseta? Ia o le a avatu le avanoa. E le o se faauilavea la a?

Afioga Hon Lautafi Fio Selafi Purcell: Ia o le a toe avatu se isi au lauga i se taimi ae na o se faauilavea ia Peseta. E sao lelei le mea lea e finau atu ai Peseta, e eseese lava auala lau afioga i le Fofoga Fetalai. O isi taimi e faui atu lau faauilavea e pei e amata atu e te au ai, ona faatoa tuu atu lea o le siusiu a o isi taimi ia e amata faapea e te le au i ai ae faapena le faiga o le tatou... lau afioga. Ou te auai i le saunoaga a Peseta ona o saunoaga ia e saunoa mai ai Olo aua e te manatu tele i ai faapea e le i lelei le tapenaga. Leai sa tatou galulue lava i le mea e gata ai ia aumai le vaalele. A o lea e omai latou e ese le mea lea e faamuamua, a o lea te faasao lelei ia te oe, finau pea i ai ia aumai se tatou vaalele aua te faalogo tele ia Olo leaga e ese le angle lau sau ai Olo, ae faauau pea lau finau lēna Peseta ou te lagolago tele ia te oe. Faafetai i lau afioga.

FOFOGA FETALAI: Ia o lea ua maua le agaga o le faauilavea a Satuipaitēa lau afioga i le sui usufono mamalu mai le Faasaleleaga. Ia ou te ofo, o lēna ia oe le tofa aua le Nofoa o le Itumalo faauma mai lau saunoaga.

Afioga PESETA VAIFOU TEVAGAENA: Faafetai lau Afioga, Satuipaitēa aua le popole lau afioga i le Minisita aumai le tatou vaalele.

Pau lea o le tatalo i le tulaga lea ae o lea ou see ese lau afioga mai le tulaga lea.

Ona oo mai lea lau Afioga i le Sui Palemia i le tulaga foi lea ua i ai a tatou Business License. Ou te fia fesili lava i lau Afioga, e i ai se mafuaaga ua taofi ai faapea Pisinisi Laisene ona toe faafouina? E i ai se vaega taua? ae pei e tasi lea vaega o lo o maua ai le tele o le tupe o le atunuu e tua i ai le atunuu a ua fou lea mea ua o atu e togi Pisinisi Laisene lau afioga. A o lea ua taofi mai se i uma le fono a la outou Kapeneta ona o loo faafogafoga le atunuu ma le mamalu o le aufaipisinisi, se i aumai sao lava le tali po o le a le tulaga aua afai o le tulaga lea o lea la se fua foi la mo mea o laisene o taavale? Afai la o le taavale lea e expire taeao e faatali a la outou Kapeneta faatoa toe renew le pisinisi laisene o le taavale. E pei o le agaga lea o le faafesili atu a lau afioga leaga ua ese lea mea ua tulai mai. Ma lou faaloalo lava.

FOFOGA FETALAI: Ia lea ua maea, po o ua maea mai le saunoaga lau afioga i le sui usufono mamalu? Ia tulai mai lau afioga i le Minisita mo Galuega Tetele.

Tofa Hon Olo Fiti Afoa Vaai: Lau afioga le Fofoga Fetalai, leaga o lea ua pei ua lavelua mai le fesili. E faamalulu atu i le afioga i le sui usufono, e tasi lava le aso na malolo le LTA mai le laiseneina o taavale ae na matuai tatala faasoloatoa ma e alu lava i so o se taimi le laisene o taavale. E leai lava se taimi e taofi ai vagana ua e alu atu ua le atoa lau seleni e laisene ai ia ona e malie lea ua e toe foi mai, ma le pe o moli o taofi o lau taavale ia ona e toe foi mai foi laia, ma lou afio atu o lena ua expire lou laisene e le mafai foi ona laiseneina lau laisene. Ae sa tatala atoa mea uma lau afioga Peseta ma le faafogafoga a le atunuu e leai se taimi na taofi ai le laiseneina o tatou taavale. Ma le faaloalo.

FOFOGA FETALAI: Tulai mai le sui usufono mamalu.

Afioga PESETA VAIFOU TEVAGAENA: Lau afioga i le Fofoga Fetalai masalo e le o maua mai e le Minisita le sao o le mea lea ou te avatua. O le tuualalo lea avatu e faafesili ai lau afioga i le Sui Palemia, ona o le tulaga lea ua faasalalau mai le aso e faagata ma faafou ai laisene, a o lea ua o atu nei le toatele o le atunuu e faafou a o lea ua taofi. O le faaupuga lea na aumai mai le Matagaluega se i uma le fono a le tou Kapeneta. O le mea la lea e popole ai lou nei sui usufono pe i ai nisi mea e ese mai i le tulaga o le a faaopoopo i luga o le faaiuga o le faafouina o le Laisene po o le a.

O le ala lena e ala ai ona ou fesili lau afioga leaga o le la e faalogologo mai le atunuu ma le aufaipisinisi aua o le mea moni lava ua fou lea mea lau

afioga pe aisea ua le mafai ai ona faafou laisene. Ae faafefea la ona operate pisinisi i totonu o le atunuu pe a faapea o lea e le o mafai ona faafouina laisene o le 2023?

E pei o le agaga lena lea na ou avatu ai le tulaga lea aua leaga e faamoemoe le tatou Malo i tupe maua, e faamoemoe lo tatou Malo i tupe maua. E pei o le agaga lea ou te faafesili atu ai lau afioga.

FOFOGA FETALAI: Se i tulai mai lau afioga i le Sui Palemia, po o le Minisita foi o Pisinisi.

Afioga Hon Tuala Tevaga Iosefo Ponifasio: O au o le Minisita o Tiute ma Tupe Maua. Faafetai. E ese le manaia o le manatu lea, masalo o se avanoa taua foi lena i le aumaiga o le fesili e ao ona avatu se tali ina ia manino ma malamalama ai foi le mamalu o le Palemene, aemaise foi le mamalu o le tatou atunuu o lo o faafofoga mai. E le natia e moni o lea na alu foi le faasalalauga a lena Itu, lena Matagaluega i le tulaga o lo o i ai le faafouina o laisene pisinisi, aemaise foi le toe talosagaina o ni laisene e faatino ai pisinisi fou.

O le mea muamua lava lau afioga i le Fofoga Fetalai, o le saunoaga a le sui usufono o lo o faapea mai ua taofia le tulaga o le talosagaina po o le faafouina o laisene o pisinisi. E le o taofia lau afioga, e le o taofia le tulaga lea i le taimi lena, masalo a tatou toe tomanatu i le masina ua tea le masina talu ai, lea na tatou pasia ai i le amataga o Tesema le Tulafono Faatonutonu e agai lava i le toe talosagaina o pisinisi, laisene o pisinisi fou ia aemaise foi pisinisi o lo o faafouina. O le Tulafono Faatonutonu lena lea ua mafua ai le suiga lea ua le o taofia a outou afioga o le taimi lena o lo o i ai manaoga o le Tulafono Faatonutonu e ao ona usitaia uma lava e tagata faipisinisi. Ioe, o lo o aafia pisinisi faafouina e fia faafou ma pisinisi laisene fou o lo o fia talosagaina. O le mafuaaga lea na fofola ai le tatou Tulafono Faatonutonu ma pasia e le tatou Palemene ona o manaoga a le faalapotopotoga a le tamaoaiga a le lalolagi ina ia suia le tulaga o lo o i ai le tatou pemitā po o laisene o pisinisi ina ia tuu ia i le manaoga e tatau ona faailoa mai le tagata e ona le pisinisi, le tagata moni lava e ona le pisinisi ia po o le tagata moni lava o lo o faatautaia le pisinisi.

E silafia foi e le tatou atunuu, o lea e i totonu o Samoa i totonu o le black list poo le lisi lea o lo o tuuina mai e le OECD po o le faalapotopotoga lea o lo o vaai le tamaoaiga o le tatou atunuu, o lo o black mark ai Samoa ona o le tulaga o lo o i ai tatou Tulafono. O le manaoga la lena o le OECD lea ua ala ai ona toe amend, teuteu le Tulafono lea ia Tesema e i ai le manaoga lena ina ia faailoa mai o ai tonu le tagata e ona le pisinisi? E le natia, masalo ua outou silafia. O tatou faleoloa e tu mai luma le tamaitai po o le tina Samoa a o le potu o lo o i tua atu e lua, tolu, Saina o lo o nonofo i ina ma computer e vaai uma mai mea o lo o tutupu i luma. Ae ua ala ai ona

mafai ona talosagaina ma faatino le pisinisi lea ona o le faaaoga lea e i latou nei o tagata Samoa e omai e front mai le pisinisi o tagata Samoa e apalai mai i le laisene pisinisi, aepeitai e le o latou e ana le pisinisi. Na ona o atu faafaigaluega e Saina nei ia ua faalauaitele atu le upu Saina leaga o lea o lo o i ai mau maumaututu e pei a o tagata ia mai i le vaega lea o i latou ia o lo o faia le tulaga lenei. E le o i ai se taofiga, pau a le mea ia faailoa mai i le Matagaluega o ai tonu o lo o control ina le pisinisi lenei. O le mafuaaga lena, o lea foi o lo o nafa le matou Matagaluega faapea foi ma le Matagaluega o Tupe ma le SIFA i le taumafai lea e aveese mai Samoa mai i le black list ina ia tauleleia Samoa i le va o fefaatauaiga aemaise le tulaga i totonu o le Faalapotopotoga o le Tamaoaiga o le lalolagi o lo o i ai nei. E pei o le mafuaaga lea o le faafofoga mai a lau afioga faapea ma le tatou Palemene ae le o taofia, e le o taofia, ae malilie foi le tatou afaipisinisi, e ala ona outou usitaia ma savalia tulaga o manaoga o le Tulafono o le puipuiga foi lea o le tatou atunuu. O lo o tele foi ni faitioga o loo aumai ua tumu le atunuu i pisinisi a Saina, o loo faitio mai foi le au fai pisinisi ua taugofie tele le tau o oloa ua le mafai e nisi o pisinisi Samoa ona faatino ia pisinisi. Ia aemaise le tulaga tau faleoloa. Aisea? Ia o tulaga ia ua ou faamatala atu ae aua nei tuuaia le tatou Matagaluega o le isi lea galuega ua leva ona tatau ona faatino e le Malo na tea nei lea ua ou fai atu sao lava. Ua leva foi ona taoto le manaoga lea o le faalapotopotoga o le tamaoaiga o le lalolagi ua 12 tausaga ua fai mai le faalapotopotoga lea o le tamaoaiga o le lalolagi, sui le Tulafono. Aepeitai e le i suia e Samoa. O le mafuaaga lena ua ala ai ona tele ituaiga pisinisi eseese a tatou Saina lea ua i totonu o Samoa ae na o le tutu o le Samoa ma fai le faatau a la e faasoia e le Saina le tupe i tua ma ave i fafo.

Ia o le tala lea lau afioga, masalo e toe maua se isi avanoa e toe faamanino faalauaitele atu ae pei o se tali puupuu atu lea e tusa ai ma le faafesili a le sui usufono.

FOFOGA FETALAI: Faafetai ua manino le saunoaga a lau afioga i le Sui Palemia, o le Minisita foi lea o loo fitoitonu ma lea tulaga. Ia o le mea sili o lea ua saunoa manino le Sui Palemia e le o taofia, ae o lo o i ai ni nai manaoga taua o loo faatino aua le manaoga faale-Tulafono. Ae ua i ai le manatu ua maea foi lou taimi le sui usufono mamalu i lau faafesili mulimuli lea na fai mai nei ia o le taimi foi lenei, se i tulai mai.

Afioga PESETA VAIFOU TEVAGAENA (Faasaleleaga Nu 5): E momoli lava la'u faafetai i le afioga i le Sui Palemia, ua manaia le faamalamalamaga mai o le tulaga lea. Ae ala ona ou fai atu e le o se manatu foi ua ou fai atu o lau foi fanau e fai le pisinisi tulou. Atonu foi o le toatele o lenei Maota e toatele a e i ai uma pisinisi o tatou aiga ae o le mea lea ua tupu o le tali lea lau afioga i le Sui Palemia, ua o atu faafia lau fanau

e oo foi nai isi tagata o le tali lea ua aumai e le mafai ona faafou se i uma le fonu a le Kapeneta.

FOFOGA FETALAI: Malie le sui usufono mamalu, lea ua uma na saunoa le Sui Palemia ma o le tali foi lena o le tatou Malo le tulaga lea leaga le matau atu o lau fanau sa tou talanoa. A o lea ua saunoa manino le Sui Palemia i totonu o le Maota e talitonu foi lena o le tatou mataupu. Malie lau afioga i le Sui Palemia ua faamalieina foi le faafesili ia aemaise o le vaega e pito sili ona taua lea ua faamanino e le o taofia ae o lo o i ai nai mea o loo manaomia.

O le mea lea ua tatou taunuu mai i le tatou taimi malolo, o le mea lea, o le a faataatiaese galuega a le Fono Aoaofaitulafono mo lana malologa.

Na faataatiaese Taulumaga a le Fono Aoaofaitulafono mo lana malologa masani i le itula e 10:48 i le taeao ma toe amatalia i le itula e 11:37 i le taeao.

FOFOGA FETALAI: Ou te faasilasila atu ua toe amatalia nei Taulumaga a le Fono Aoaofaitulafono.

Ou te tapa lau Afioaga i le Sui Palemia mo le lafo.

LAFO MO LE SUIA O ITULA FONU

Afioga Hon TUALA TEVAGA IOSEFO PONIFASIO: Lau Afioaga i le Fofoga Fetalai, e manatu o lea ua maea paleauau le tautega ma le taligasua a le tatou Maota. Faamalo faafetai foi i lau Afioaga ma le tatou Ofisa mo le tapenaina o le faamalosiaga a le Palemene i lenei aso.

Lau Afioaga e matau atu ua le o toe po se lilo i le tatou galuega i le faagasologa e le itiiti se taimi o le a sausaunoa ai sui usufono mamalu, ae manatu foi i nisi o galuega taua o lo o feagai ma le tatou Malo. Ou te tulai ai ma le faaaloalo lau Afioaga e faatu le lafo, *Ina ia faataatiaese Tulafono Tumau 32 mo le sui o a tatou itula Fonu mo le aso Fonu lenei e faapea; O le a faaauau pea le tatou Taulumaga seia aulia le itula e 1:00 i le aoauli, ona faataatiaese lea mo se malologa ma toe faaauau ai i le itula e 3:00 i le aoauli ma faaauau ai pea seia tolopo i le itula e 7:00 i le afiafi.*

O le lafo lea ma le faaaloalo lau Afioaga.

Faaluaina e le Minisita mo Faatoaga ma Faiga Faiva.

Na faamaonia le lafo.

FOFOGA FETALAI: Ia, o le a faagasolo le tatou galuega e tusa o le lafo ua faamaonia.

E faataatiaese a tatou Tualumaga mo le malologa o le taeao ua maea le saunoaga a le sui usufono mo Faasaleleaga 5. Faamalo saunoa i lau Afioga, faafetai foi mo lou sao i le tatou Tala Faatatau o Tupe Faaopoopo o lo o lauiliuina nei. Malo faafetai...

Afioga Peseta Vaifou Tevagaena: Lau Afioga i le Fofoga Fetalai...

FOFOGA FETALAI: Se i tulai mai lau Afioga i le sui usufono mo Faasaleleaga 5.

Afioga PESETA VAIFOU TEVAGAENA: Ou te talosaga atu ma le agaga faaaloalo i lau Afioga, o lea ua toe tasi lava le Afioga i le Minisita lea ona faauma loa lea o le lauga a lenei itumalo aua foi le lagolagoina. O le lagolagoina o le Tala o le Tupe lau Afioga i le Fofoga Fetalai, ae pei o si vaega sia e taua tele, ona o la e nofo tapuai mai si ou itumalo.

Ona o lea lau Afioga e le o afio mai le Minisita mo Tina ma Tamaitai e uiga i lana tusi na tuuina mai i le matou Komiti, aemaise le tulaga foi lele o le Ofisa o le Fono Faavae. E pei o le agaga lea lau Afioga, ae o le mea sili faafetai o lea e afio mai le Taitaifono, ia o le a agai sao atu i ai se manatu o lou nei sui usufono, ona o lea ua aumai le tusi, e le toe aumaia se tupe, na o le \$200,000 lea na aumai i si o matou itumalo e faatino ai le Ofisa ma totogi ai le Komiti, ma le tusi la lea ua avatu, e le toe aumaia se tupe. O lona uiga ua le agavaa foi si ou itumalo i le \$150,000 lea. O le fesili lea i lau Afioga i le Taitaifono, ona o lea lava e maua e lou sui usufono lenei ia saunoaga foi a lau Afioga i luga o le TV, o le a tufa le tai \$1 miliona, e tuuina atu lava i outou aao, e pule lava outou. A o lea la ua fesiligia tupe ma faapea mai, e le toe aumaia se tupe. E moni la e le i maea ona fausiaina le tulaga i le ofisa o si o matou itumalo, ae pei e foliga mai ia te au, o lea ua taofi atu le tulaga tau tupe. A o lea ou te maua lelei saunoaga a lau Afioga i le Taitaifono, e tuuina atu i o outou aao, ioe, e faitalia ai lava outou, e pule ai lava outou. Ae pei o lea ua e toe saunoa faapea ua mafua tulaga ia ona ua le ausia Taiala ma vaega uma.

E pei o le tulaga lea ua ou toe faafesili atu ai i lau Afioga, ona a silasila foi lau Afioga, o lea ua \$1,200,000 le tupe ua faaalu i lou itumalo, a o lenei lava na o le \$200,000 lea e...

Susuga Hon Laauli Leuatea Polataivao Fosi: Lau Afioga i le Fofoga Fetalai ua ou...

FOFOGA FETALAI: Ia, o lea ua maua le agaga o lau Afioga i le sui usufono mamalu...

Ia se i tulai mai lau Afioga i le Minisita mo Faatoaga ma Faiga Faiva.

Susuga Hon Laauli Leuatea Polataivao Fosi: E tatau ona ou vave pipii atu... Malie lau Afioga i le Fofoga Fetalai, e tatau ona ou vave pipii atu e faamalamalama leaga o lea e lautele le aumaiga e le Afioga i le sui usufono mamalu o le mataupu. O le afioga i le Minisita o Tupe, o ia lena o lea ua tauavea le tiute o le Minisita o le \$1miliona a o au ia o le sui o le Komiti Faafoe o lo o lauliliuina uma mataupu ia e te atugalua mai i ai.

O le mea e fia faasao muamua, o le upu lea tufa, o i lea e tatau ona faamanino lelei le upu lea. E le i i ai se upu na matou taua e tufa, e avatu loa tufa. O le mea na folafola, o atinae e faataavalevale mai ai le tupe lea. E tou te silafia lelei, o le poloketi lenei, o le mea fou, o se faiga fou, o se mafaufauga fou, faatoa tupu muamua i le tatou atunuu talu ona tutoatasi. E ave se tai \$1 miliona i aao o itumalo taitasi, alii ma faipule e atiae ai le itumalo. O le mea lena e tatau ona faamalamalama lelei, ne i te i ua tatoso solo faalau o upu, a o au na faia le upu. O le faamalamalama la mo le toe faafofoga mai o le atunuu, e ese le mea o le tatou tufa masani pe a faasoa le tamaoiga o le itumalo, e avatu lava tufa. O le faamoemoe o le Malo, e fai ona faiga faavae, faavae i lalo o aiaiga o tupe faatonutonu Tulafono a le Malo, Finance Management Act a le tatou atunuu ma tulaga uma na sa faamalamalama atu. Ae o le upu lea tou te taumafai mai pea, o le a le mea ua tuai ai? O le a le mea ua le avatu ai? Ia lena ua agiga upu, aumai loa tufa. Malilie sui usufono mamalu o lena Itu o le Maota, e le o le agaga lena o le poloketi lenei.

O le agaga o le poloketi lenei e avatu i alii ma faipule e faasoasoa lelei i atinae ua silafia e le pule mamalu a alii ma faipule e manuia ai le itumalo. E le i faigofie le tatou finauga mai le amataga o le poloketi lenei, e le i faigofie leaga sa outou le talitonu. O a upu na lafo mai? E le moni, e pepelo, e leai se miliona e tupu, e leai se miliona ma se poloketi faapea e fai. O le mea lea malie le sui usufono mamalu, se i i ai se taimi ona saunoa lea o le Taitaifono o lo o tauaveina le Matagaluega o le miliona i le taimi lenei ona faamalamalama atu lea o le mataupu. Ae na ala ona toalia itumalo lea na ou taua, ua le usitaia faiga faavae ma aiaiga na avatu ai le \$200,000. O le a le mea na avatu ai le \$200,000? Na avatu e fau ai ofisa. E \$132,000 fau ai le ofisa ma faatotoga, \$32,000 e fai ai totogi o le aufaigaluega ma alauni o Komiti. O le isi \$30,000+ e fai ai cashpower, o lisi ma mea uma faapena. A o le a le mea lea na tupu? O le isi itumalo alu atoa lava le \$96,000 tufa. Ae faasau i totonu, fai mai o le tupe o le lisi mo le 4 tausaga. E leai se faiga faavae faapena na avatu e le Komiti o le Miliona e fai se \$96,000 e tufa i le itumalo atoa mo le lisi. Ua matua ova lava le solitulafono o le mea lena, ma e tatau ona faamalamalama leaga o lea e felele solo a tatou finauga i upega

o faamatalaga. O lea ua ou fai atu, o itumalo ia e 10 lea ua taofi nei, ua le mulimulitaia faiga faavae na avatu e le Matagaluega e limataitaiina ai le faaaogaina o le \$200,000 lea, faamautu lelei tatou ofisa. Ia i ai totoga, computers, telefoni, faiga faatekonolosi e fono ai le Komiti e fai le mea. O isi itumalo, fai mai ua uma ona alu le mea e fia i i, fia i, selau ma ona tupu afe i i, o atu e leai se ofisa, o la e lisi i le faleaoga pe lisi i le fale komiti. O mafuaaga na lau Afioga i le sui usufono mamalu, ma lou faasaoga mulimuli lea, e le i i ai se upu e tufa se tupe, e le tufa faapea le tamaoaiga o Samoa lau Afioga i le sui usufono mamalu. O iota uma o le tamaoaiga o Samoa e fuafua i faiga faaletulafono i tupe faaalu a le atunuu, leaga o tupe a le atunuu. Ae a fai la faapea na ona avatu lava ma tufa, ia, e le o le taunuuga lena e manuia ai le tatou poloketi.

A o le faamalamalamaga lena, leaga o lea lava e tou te tuuaia mai e faaoloataua ai finagalo o le atunuu faapea na matou fai atu e tufa, e leai. Faafoga Samoa, e faatino ai poloketi ua finagalo itumalo e aoga mo latou. Ia o si au faamalamalamaga lea lau Afioga, o se taimi saunoa le Afioga i le Minisita o Tupe o ia foi o le Taitaifono o le matou Komiti i le taimi lenei, ina ia manino le faafoga mai a le atunuu. Ma le agaga faaaloalo.

FOFOGA FETALAI: Faafetai i lau Afioga i le Minisita, atonu o lea ua manino lea vaega. O le itu foi lea lau Afioga i le sui usufono mamalu, o lea foi ua maua o lea ua ave le fesili agai i le Taitaifono, o lea ua manino le tulaga lea, atonu o se taimi toe saunoa foi le Taitaifono, saunoa foi le Afioga i le Minisita i totonu o le Komiti, ia o lea ua faamanino ai lea tulaga.

Ia ou te talitonu ua faamalieina lau afioga, o lea foi ua faauma atu lou taimi.

Afioga PESETA VAIFOU TEVAGAENA: Ia, o le agaga faafetai lea i lau Afioga i le Fofoga Fetalai, o lea ua tau faamalamalama mai e le Afioga i le Minisita, ae pei o le tulaga lena sa tuliloa ona o le tusi o lea ua aumai e taofi, ua aumai ai ma le faaupuga e le toe aumaia se tupe i si ou itumalo. A o lou itumalo, o la e tau teuteu le tulaga foi lea ma le siosiomaga i le fanua e fausia ai. Ua uma ona faatau mea e fau ai le ofisa, ua maea. E moni la e le i aumaia le Tala o le Tupe a lou itumalo, a o lea ua avatu le tusi e taofia. O le popolega la ia te au, o tupe a le tatou atunuu lea ua faaalu e faatau ai mea ia.

Ae pei o lea ua maua leaga sa ou faalogologo pea faalogologo pea i saunoaga a lau Afioga i le Minisita, e tuusao atu lava i outou lima. E pei o le agaga lea e ala ai ona tuliloa lava le mea lea i lau Afioga. O lea la ua e faamalamalama mai i le taimi lenei, ia, ou te le toe agai i ai, o le mea sili o la e faalogologo mai le atunuu. O lea la o le a alu le lua tausaga lenei, a o lea na o le \$200,000 lea ua aumai i lou itumalo. Ou te le agai atu la i mea o

lo o tutupu i isi itumalo, a o lou lava itumalo. O fea nei miliona na folafola? Aumai.

Susuga Hon Laauli Leuatea Polataivao Fosi: Lau Afioga i le Fofoga Fetalai, e lelei lava le tatou fetalai.

FOFOGA FETALAI: Ia, se i saunoa mai lau Afioga.

Susuga Hon Laauli Leuatea Polataivao Fosi: Leaga se pei o le ao le tilotilo atu i le tactic lea e fai, o le delaying tactic. That's what you are doing? Tulou foi nai isi itumalo na e i ina o lona tou te agai mai e fusi le poloketi. A i ai le sui usufono e alofa i lona itumalo, lagolago le mea lea, o lea ua ou talosaga atu. O le mea muamua lea na ou faamalamalama atua, ua le savalia le faaogaina o le tupe. A na avatu le faiga faavae a le Matagaluega? Lea ua ou faamalamalama atua, e \$132,000 le ofisa, o le isi tai \$32,000 ma ona tupu o lona. O le isi itu lea na toalia ai o lona e te... o le maopoopoga o le Komiti. Ia sao tagata e saofafai ia laugatasia uma le faasoaina o le tatou tupe. O i lea foi na tatou vevesi ai ua manatu e tatau ona i ai sui o lona itu, tatau foi ona i ai sui o lenei itu. Aisea? Ina ia taatia lelei i le agatonu le faamaoni o faiga faaiuga. Ia ua alu alu nei tou Komiti nei e pisa, na o lona lava Itu o le malu, valiano uma sui o lenei Itu na o faatasi e tau momoli le feau. O i lea e tutupu ai le feteenaiga i le va o Komiti.

O le ala lea ua ou toe faapai atu i lau susuga i le sui usufono, o lau tuualalo, faamaopopo lelei lau Komiti, ia i ai uma tagata e talafeagai ona i ai ona saausi laia, aua e leai nisi e faia le lelei o le itumalo, o lau Afioga i le sui usufono ma le Komiti, ia malilie uma tagata i totonu o le Komiti ma ia usitaia faiga faavae o lea sa fai atu. A o isi lava sui usufono o outou, ia o la e matua see lava. Ia Anoamaa ia, ua matuai maopopo ma alu i le atoa. Ia o lona foi e nofonofō mai Lenatai ia ae le se i share atu le matagofie o le mea lona ua i ai lana Komiti. Ia, o si au fesoasoani atu lona ma le agaga faaaloalo.

FOFOGA FETALAI: Malo faafetai. Ia atonu o lea ua manino lea tulaga lau Afioga i le sui usufono mamalu. O lea lava e le faapea foi ni faaiuga na pau mai le lagi, o faaiuga lava o lea e fai e tatou nei. A o lea ua saunoa manino le Minisita, e i ai auala e tatau ona faatino e le Minisita pe a alofa moni i lona itumalo.

Ia, ua lava lea mo lau Afioga i le sui usufono mamalu.

Afioga PESETA VAIFOU TEVAGANAENA: Malo faafetai i lau Afioga i le Fofoga Fetalai. O le itumalo lenei masalo e silafia foi e lau Afioga i le Taitaifono, e na o sui usufono lava o le HRPP na alu ai, leaga o

lea ua aumai le tou taiala, ia i ai ma nisi o sui o le tou Vaega Faaupufai. O lea la ua e faamalamalama maia le tulaga lea, ae aua ne i galo le itumalo lenei, na o le HRPP lava na o ai, e leai ma se isi e iloa ai o le FAST lea a o le HRPP lea. E pei o le agaga lena o lea e tau faamalamalama atu lau afioga.

FOFOGA FETALAI: O le a see ese le saunoaga a le sui usufono mamalu ma tulaga o le tatou mataupu. O lea ua saunoa le Minisita, ia o le mea lena e lafo atu i lau Afioga e saili avanoa e teuteu lena mea, ae le o le faailoa mai i totonu o le Maota e leai se mea a le Maota e faia i le tulaga lea. O lea ua manino le saunoaga a le Minisita, ia, e faamoemoe foi i lau Afioga o le sui usufono matua o le Maota e faapena ona sailiili malie le tofa i le itumalo ma lau Afioga ina ia maua pea ni faamanuiaga a nai o tatou itumalo.

O le mea lea lau Afioga i le sui usufono mamalu, e talitonu foi o oe o se tasi o sui usufono matua, e le suia foi le faaiuga a le Nofoa o lea ua fai atu ua maea lou taimi. Ia, o lea e tuuavanoa atu lava o le vaai atu, o le ava atu.

Afioga PESETA VAIFOU TEVAGAENA: E momoli atu le faafetai i lau Afioga i le Fofoga Fetalai. E momoli atu foi le faafetai i lau Afioga i le Sui Palemia ma le tou Kapeneta, faapena foi lena Itu o le Malu, faapena foi lenei Itu o le Malu. Ou te faamalulu atu foi, afai foi ua le tautamalii se tala foi a lenei itumalo, ia e faapena lava finagalo o le Maota lenei. E le aoga ona nofonofono pe taofiofi. Leai, e lelei lava le avatu i luma o le Maota leaga o la e nofo tapuai le tatou atunuu. O le mea lea, ia faamanuia le Atua i lau Afioga i le Fofoga Fetalai, faamanuia foi i le siigamai a le Afioga i le Tamaitai Palemia ma le Afioga i le Minisita, manuia foi le tapuaiga a si o tatou atunuu, ae faapea foi le tapuaiga a si ou itumalo. Soifua ma ia manuia le Fono.

FOFOGA FETALAI: Malo faafetai saunoa. Ia mea sili o lea ua faafofoga foi le Maota aemaise o le Kapeneta, atonu o se taimi foi saunoa e faamalamalama nisi mataupu e pei ona fofogaina e lau Afioga i le sui usufono mamalu.

Ia o le avanoa lenei o se tasi o sui o le tatou Maota. Ia, tulai mai le sui usufono mo Falelatai ma Samatau lau Afioga i le sui usufono mamalu.

Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau): Faafetai i lau Afioga i le Fofoga Fetalai mo le avanoa o lenei foi itumalo. E manatu o lea ua maua se faasiligamalosia e lau Afioga ma le mamalu o le Palemene i le taligasua i le taimi ua sola. O le mea lea e momoli atu le agaga faafetai i lau Afioga i le

Fofoga Fetalai faapea foi le Failautusi ma le Ofisa o le tatou Fono mo le malutaeao.

E i ai le manatu o paia o lenei Maota Fono aemaise o le faafogafoga tapuai mai a le tatou atunuu, o auauna paia a le Atua, o lea ua maea ona paelago e lau Afioga i le Fofoga Fetalai i le taeao ua sola, ae manumanu foi i le taimi, o le a faataalolo. E i ai foi le manatu o lea ua uma ona e sulaina le alofa ma le agalelei o le Atua ma faatagisia le agaga o le Atua ina ia tautoaluaina le tatou fonotaga i le aso. Ia, tatou te aufaatasi i le taulaga molia e lau Afioga i le Fofoga Fetalai.

Ae ua ou tulai atu i le ava ma le faaloalo i le tapuaiga a si ou itumalo o Falelatai ma Samatau faapea foi le nofo a faafeagaiga e fia i so o se fatafaitaulaga, aemaise o le tatou itumalo o lo o alaala ma papaaao i atunuu e mamao ma so o se itu o le lalolagi, ia tapuai maia se i fai se sao o le tatou itumalo i le Tala Faatatau Faaopoopo o le Tupe ua opea nei i le Maota Fono.

E amata atu se manatu o lenei itumalo i le Matagaluega o le Soifua Maloloina. E momoli atu le agaga faafetai tele ma le faamalo i lau Afioga i le Minisita faapea foi le faamalo ma moomooga alofa i le Afioga i le Ofisa Sili o Pulega ua tulai mai i lenei vaitau e tauaveina le tatou Matagaluega, o se tasi o Matagaluega tele a le tatou Malo. Malo le galulue, malo foi le faatoatoa. E ui lava ina aafia le lalolagi ma si o tatou atunuu i le mau faamai, aemaise lava le Koviti-19, ae maeu le agalelei o le Atua o lo o saogalemu pea si o tatou atunuu.

Ae pau lava si faatupu manatu e tuuina atu pea i lau Afioga i le Minisita faapea foi le Ofisa Sili o Pulega ma le Matagaluega, ua maua i tala o le lalolagi i le toe tulai mai po o le toe pepesi mai o le faamai o le Koviti-19. O se tulaga foi e le tatau foi ona tatou nofonofo ai. A o le faafesili; po o le a se tapenaga a le tatou Matagaluega faapea foi le tatou Malo, pe afai ae toe aafia si o tatou atunuu i nei foi faamai matautia e pei ona toe maua ai Saina ma nisi foi o atunuu malolosi ua toe tulai mai le faamai lenei i se tulaga e ono aafia ai si o tatou atunuu?

O le mea foi lea e toe faamanatu atu ai i lau Afioga i le Minisita ma le Matagaluega, i le falemai o lenei itumalo, o lea lava sa lagona le fiafia ma le loto faafetai ina ua amata foi lenei Paeaiga, o lea sa i ai i fuafuaga a le Malo ua uma ona pasia le falemai o lenei itumalo. Ae ai se manaia pe afai ae toe tulai mai lenei faamai a ua maea ona fausiaina le falemai o lenei itumalo, o le a tele se fesoasoani mo tagata o si ou itumalo pe afai ae toe tulai mai lea faafitauli.

O le vaega lona lua, o suiga ogaoga o le tau. E le o toe po se lilo i le tulaga mafatia o lo o aafia ai foi si o tatou atunuu aemaise o nofoaga maualalalo e aafia ai foi lenei itumalo. O le mea lea e toe valuvalusia ma faamanatu atu i lau Afioga i le Minisita o Galuega, se i alofa ane i lenei itumalo, o lenei ua uma ona taatia i lumamea le talosaga a lenei itumalo i

ona auala galue, faapea foi le Minisita mo le Siosiomaga mo le taligalu. Ona o le taimi nei, e le o lava auala galue e mafai ona sulufai i ai le mamalu o lenei itumalo pe afai ae toe tulai mai ni faalavelave faalenatura.

O le vaega lona tolu e fia o o i ai se manatu o lenei itumalo, e le o po se lilo i le tau o le soifuaga o lo o i ai i lenei vaitau. O lo o faalogologo foi ma tulimatai e si o tatou atunuu po o le a se faamamaavega e mafai ona faatino e le tatou Malo i le tuumamaina o le tau o le soifuaga.

O lea e maitau atu lenei itumalo i le Tala o le Tupe, e momoli atu le agaga faafetai i lau Afioga i le Minisita ma le Matagaluega. A o le vaai a lenei itumalo, e leai lava ni mea se tele o aumaia i le Tala Faaopoopo o le Tupe, seiavagana ai le \$50 o lo o faaopoopo i le penisione faapea foi i latou o maua i aafiaga tumau. A o le mea o lo o tulimatai e si o tatou atunuu, o le a se galuega e mafai ona fai e le tatou Malo ina ia mafai ona maua se faamama avega i le tau o le soifuaga, aemaise lava o meataumafa. E le o po se lilo i lena foi tausaga ua tuanai atu sa tatou pasia ai nisi o Tulafono o Tiute o Meataumafa, ae pei o le vaai lena ma le tuualalo a lenei itumalo, se i silasila ane. Ua manaia fuafuaga mo le siitia o penisione ma e o lo o i ai aafiaga tumau o le soifua, o le faafesili pe aisea ua amata ai ia Aperila, Me Iuni, ae le amata i lenei taimi? Ia po o se mea ea o se mea faatosina po o se mea moni a o se manatu lena o lenei itumalo, ai se manaia pe ana amata atu lava i lenei taimi, ia alu ai ma lea tausaga pe a aulia. Ia ae manaia foi pe a faa-\$300.

E pei lava ona silafia, o le penisione o lo o faatupe i saofaga a le aufaigaluega a le Malo, ae vaavaai lava ma le faanoanoa, o lo o tilotilo foi po o le a se taimi e fai ai se siitaga o le aufaigaluega. Aua e le gata o lo o alu i luga le tau o le soifuaga, ua le gafataulimaina e le toatele o le aufaigaluega a le Malo le tau o le soifuaga o lo o i ai. O le matou tuualalo, se i silasila ane lava le faigamalo i le aafiaga o nai tagata faigaluega. O lea foi e maua i nisi o saunoaga i le taimi ua sola, ua le faaauaua nisi o avanoa o tagata faigaluega a le Malo. Ua i ai nisi ua foi mai fafo ma faailoga, ae omai ua leai ni galuega. A o lea foi sa tatou talanoa i le tau taofiofiga o tatou tagata mai galuega faavaitaimi, ia ona o le popolega lea ne i leai nisi e faatinoina le tautua ma le auunaga i le tatou atunuu. A o lea foi ua maitau atu i lenei taimi, ua le mafai ona faatunuina avanoa o lo o i ai. Ia po o le a se mafuaaga, aua o lea foi la ua afaina ai le aufaigaluega a le Malo.

O le isi vaega e fia tulituliloa, sa i ai le fuafuaga a le faigamalo e toe faafoi o tatou fanua tau Samoa i nisi o nuu ma alaalfaga. Ia, o lea foi sa vaavaai ai foi lenei itumalo, afai ae mafai ona faatino lea vaega, e fia faamanuiaina foi lenei itumalo i lea vaega. Peitai e oo mai lava i le taimi lenei, e le o mautinoa e lenei itumalo po o fea ua fai i ai le folafolaga lea na fai e le tatou faigamalo o le a toe faafoi uma fanua Samoa i nuu ma alaalfaga. Ae pei ona silafia, tasi lenei itumalo e le o lava fanua e galulue

ai. O lena foi e i le Malo le talosaga a lenei itumalo, mo ni fanua e mafai ona toe faafoi atu e galulue ai lenei itumalo.

O nisi o vaega lau Afioga i le Fofoga Fetalai, e fia agai atu se faamatalaga i pisinisi. Ua maua i saunoaga a nisi o sui usufono i le taimi ua sola, ia ae i ai foi nisi o lenei itumalo ua aafia ai i le tulaga lea. Ua saunoa malamalama foi le Afioga i le Minisita o Tupe Maua ma Lafoga i le tulaga o le toe faafouina o laisene pisinisi. Ae ua i ai foi nisi o lenei itumalo ua oo mai foi le faasea e omai e faafou laisene o latou pisinisi, a o le faamatalaga lea e i ai, e toe laisene atoa lava le pisinisi. Ae na ala foi ona fai lea faiga e le faigamalo talu ai, ina ia maua se faamama avega mo nai o tatou tagata i le taugata o le laiseneina o latou pisinisi.

O le mea lea e avatu ai pea le tuualalo, o lea ua maua atu le agaga o le Minisita ma le faigamalo, ina ia silasila totoa i e ana pisinisi, ona o le toatele o nisi e ese igoa o lo o alu ai le resitala o latou pisinisi, ae ese tagata o lo o anaina pisinisi. O se tulaga lelei, ae na pau lena o le tatalo ma le talosaga a lenei itumalo, ia se i silasila totoa i le afaina o nai o tatou tagata, aemaise lava o nai tagata o lo o i ai pisinisi ae o lo o omai e fia faafou a latou laisene, a o le tulaga lena o lo o i ai, ua fai si faigata tele i le taimi lenei ona comply ma tulaga uma o lo o manaomia. O nisi foi e omai i atunuu mamao e fai le faafouina o latou pisinisi, e utiuti foi le taimi e omai ai ma toe foi, ae pei o le tatalo lena ma le talosaga a lenei itumalo, ia alofagia le mamalu o le tatou atunuu mo le faafaigofieina o le laiseneina ma le faafouina o latou pisinisi.

O le vaega e fia oo foi i ai se manatu o lenei itumalo pei ona maua i le saunoaga a se tasi o sui usufono ua mavae atu, o le tatou poloketi lenei o le miliona. Ia, e le o usufono pe le o afio mai le Afioga i le Minisita e fitoitonu i ai lenei mataupu, a o lea ua maua atu i le...

FOFOGA FETALAI: Ia, malie lau Afioga i le sui usufono mamalu se i tulai mai lau Afioga i le Sui Palemia.

Tulai mai lau Afioga i le Sui Palemia.

Afioga Hon Tuala Tevaga Iosefo Ponifasio: Faafetai i lau Afioga i le Fofoga Fetalai mo le avanoa. E taotao atu lava i le mataupu lea ona e ese le taua. O lea ua avatu se faamalamalamaaga i se taimi ua tea nei, ae o lea lava e foliga mai o lo o i ai foi nisi o lo o saunoa mai, aemaise la o le tulaga lea ua aumai e le sui usufono lea mai Aleipata... oi mai Falelatai ma Samatau. E faamalulu atu i le sui usufono mai Aleipata. O le mea muamua lava, e leai se mea faapea e toe resitala atoa le pisinisi. A faapea o oe lea e i ai lau pisinisi, e te sau e faafou, a faafou le pisinisi, e toe faatumu le form, o le mea sa masani ai le tatou Malo tuai i le tulaga sa i ai, e na o le sau lava totogi le fee le tupe, toe faafou, leai ma se fesili o le Matagaluega, o ai la e ona le pisinisi lena? o ai na e te lua faipaaga i le pisinisi? A o ai foi lena e

control ina le pisinisi? O ai foi lene e penefiti i le pisinisi? E leai ma se fesili faapena, na o le totogi lava o le tupe, tafili saunoa lava le faipisinisi ia, po o ai la te paaga a o ai e pule i lana pisinisi, ae ua faafou le laisene. O le manatu la o i ai i le taimi lenei, e leai e i ai lava fesili e tatau ona avatu e le Malo fou lenei, leaga e tatau ona faamaoni ma amiotonu le tulaga e tatau ona taoto ai le faatinoia o se pisinisi. O le mea lea faapea o le le mafai ona resitala, e le sao le mea lenei, o la e mafai ona resitala le toe faafouina o le pisinisi, ae se i tali manino nai fesili na, e le o ni fesili faigata o fesili faigofie. Se i aumai le ID se i faamaonia ai le tagata e ona le pisinisi, se i aumaia lau bank account po o ai le igoa lenei e i ai le pisinisi? Aua a aumai mea na ae vaai atu le Matagaluega o la e i lalo o le igoa o Jingan po o se isi igoa e le o se igoa o le tagata lea e apalai mai, ia tulai mai lea o le fesili. O le mea faapena, o lo o taumafai le Matagaluega ina ia maioio ma ia sao faamaumauga a le Matagaluega.

O le malaga mai foi o tagata mai atunuu mamao e omai e resitala, o le mea lava e masani ona fai i tausaga uma, e tai 12 masina ma toe faafou pisinisi. A faapea o le tagata la e malaga mai fafo, o lona uiga o le tagata la e faipisinisi foi i fafo. Aua e le mafai ona e sau fai lau pisinisi iinei ae alu oe ia nofo mai fafo. A faapea o lea e iinei lau pisinisi, e tatau lava ona e toe afio mai oe ma e sau e faafouina lou laisene, ae pau lava le mea o le tali o nai fesili ia, ona faamalie lea o manaoga o le tulafono, e pau lava lea. Ou te iloa foi e pei ua tuuaia le Minisita, e faamanino atu pea le tulaga lea, o le Tulafono lea o lo o limataitaina ai le galuega a le Matagaluega na pasia i totonu o le Palemene lenei, ioe, o i ina lea o lo o i ai Tulafono, lea ua i ai le suiga lea ua i ai nei. E faamalulu atu, ou te iloa e faigata ae ese le aoga. O i e tuu ai pe tapunia ai foi ia avanoa foi ie, o le sau lava o le tagata mai Niu Sila mai Ausetalia, e sau i lalo o le visa lea e taua o le temporary resident permit to do business. O le sau lava o le tagata ma le pemita lenei, fai lana pisinisi ave lana laisene. O le isi na mea o lea e mataituina e le Matagaluega, e ese le taua o le puipuia o tatou pisinisi i le mea lea o le sau lava o le tagata fai lana pisinisi ave i ai, ae aafia ai le tamaoaiga po o le taumafaiga foi o tatou tagata iinei i Samoa e faatu a latou pisinisi. E le o taofia, e le o faasaina, e le o faafaigataina, ae o nai fesili, a faapea e faamaoni le tagata i lana pisinisi la e fai, e faigofie ia ona tali o fesili. Ae a faapea e i ai le tagata na e lafi mai tua, o le tagata lenei lea e saunoa mai ai sui usufono mamalu ia, o tagata na o lea e complain pe faitio. Ae o le talosaga lava ia i le tulaga o lo o i ai le tatou Tulafono, ia onosai, e le o taofia.

O lea foi o lo o i le Matagaluega ia le malosiaga, e mafai ona extend pe avatu ai se isi taimi, ina ia afio mai le mamalu o le atunuu e resitala pe faafouina a latou pisinisi. E le o i ai se foi faasalaga i pisinisi e le o mafai ona faafouina. Ae o le faaiuga o le masina nei lea e faagata ai, ae mafai foi e le Matagaluega ona tuu atu le isi faaopoopoga o se taimi, ina ia mafai ai

ona utagia pea le tulaga o le Tulafono fou lea ua i ai. Ae ia tatou onosai, omai se i taumafai e savalia pea ala o le Tulafono, ia tali ia atoatoa le taliga o fesili ia, ma faaali mai i le Matagaluega ia le tagata tonu lena e i tua o lau pisinisi. O lo o manaomia e lo tatou atunuu ia ni investors lelei, genuine investors, e le o manaomia ni investors foi ia, e sau ma le \$50, ae sau sue lona tamaoaiga i totonu o Samoa. Ua toatele le afaipisinisi faapena, o lea ua iinei i Samoa. O le toe tali atu lea ma le faaaloalo lau Afioga i le Fofoga Fetalai. Faafetai mo le avanoa.

FOFOGA FETALAI: Ou te iloa o lea ua manino le tulaga lea, tulai mail au Afioga.

Susuga Hon Laauli Leuatea Polataivao Fosi: Ua ou manatu e soosootauau atu ia le faamalamalama, ona o lea sa saunoa le sui usufono i le mataupu lea o eleele. Mo le silafia e le sui usufono o le itumalo o Samatau ma Falelatai e tuaoi uma ma le fanua o le Malo ia le Esetete tausi. Sa i ai le fuafuaga sa saunoa atu ai lenei Faigamalo, o eleele o le Malo o lo o i tuamaota o itumalo e le o toe faaaogaina, ua i ai le fuafuaga, e toe faamatuu atu se isi vaega mo le atinaeina lava o itumalo. Ma o lo o tumau le faiga faavae lena. Mo lou itumalo la mo lou silafia, o Samatau, Siufaga, Pata Falelatai, e na o Samatau lava le pitonuu ua oo mai, i le va faafeagai ai ma le Esetete tausi. Na talosaga mai le latou talosaga mo se vaega eleele, e faamatuu atu la i le mea tonu lea e te saunoa ai. Ma o le fuafuaga a le Esetete tausi, o le Esetete tausi o lo o faataamilo uma, o le Itu Aana, o Satapuala o Faleatiu, Lefaga, ona oo mai lea ia Fuailoloo Mulifanua, Apolima uta, Apolima tai, faasolo atua i ia tatou. O le agaga lena, ia faamalamalamaina o lea ua ou taulimaina le talosaga Samatau. Ae o lea ou te vaai o lea e i ai talosaga na tuuina mai e le faletolu lea e i uta ia Falelatai, ia Siufaga ma Pata ma Matautu, mo lou silafia ne i te i ua e le silafia ae o lea ua ou iloa. Ia taatia maia laia o lou faatuatuaga, o le a faasolosolo atu i ai polokalame a le komiti faatonu. O le Esetete Tausi o lea foi ua oo mai talosaga a Satapuala, Faleatiu, latou uma a nei e taamilomilo i fanua o le Esetete tausi lea e tau puipui atu aua le faaaogaina e le tatou atunuu. O le faamalamalama lea mo lou silafia, a o lo o faagasolo polokalame lena lea sa e atugalu i ai. Ma le faaaloalo.

FOFOGA FETALAI: Malo faafetai, atonu o lea ua manino lea tulaga i le faafofoga mai a le sui usufono mamalu. O lea ua i ai le talosaga a Samatau toe o le faletolu.

Afioga LUPEMATASILA GALUMALEMANA TOLOGATA TOGIA TILE LEIA: Lau Afioga i le Fofoga Fetalai, faafetai mo lea tulaga. Le Afioga i le Minisita o Faatoaga e tusa ai ma le tali malamalama i

le talosaga a lenei itumalo i mea tau fanua. O le tatalo a lenei itumalo, faamanuia ma fesoasoani atu le Agaga o le Atua i lau Afioga i le Minisita, e silasila alofa ai foi i itumalo e pei ona avatu talosaga, ae faafetai mo le tali mai i le mataupu e pei ona laga ma tapa ai se fesoasoani a lo tatou Malo. Ia faafetai foi i le Minisita o Tupe Maua, o lea ua malamalama ia nai vaega ia, ae ona o nisi o si ou itumalo, sa tau mai ma faaali mai foi o latou atugaluga, o le tulaga lea e ao pea ona faamalamalama atu. Ae pau lava si vaega o le saunoaga a lau Afioga i le taimi ua sola, faapea mai, o le concern lea e i ai o le aufaipisinisi, ua taugofie le tau o oloa i le au Saina. Ae sa ou faapea o le aoga lena o le competition ina ia taugofie le tau o oloa mo o tatou tagata. Ae avatu pea se tuualalo i lau afioga, ae sao ai, o lea sa tatou pasia le Tulafono i le faaiuga o le tausaga ua mavae atu, ae o nai vaega na o lo o agai i ai le vaavaai, ia maua se faamama avega i o tatou tagata, aemaise lava le tau o mea taumafa, ae momoli atu le agaga faafetai.

Sa ou taua le vaega o le poloketi o le miliona, e momoli atu le agaga faafetai i le Minisita e le o mafai ona afio mai, a o lea ua maua o le Minisita o Tupe lea e tauaveina. Ona e i ai le lagona e... sa o ta mimita lava, sa ou faapea au ia, o lenei itumalo o Falelatai ma Samatau, o le isi lea itumalo o lo o lelei le faafoeina o lana poloketi. Ua maea ona fausia le ofisa, faatotoga, faafaigaluega tagata faigaluega o le komiti, o mea uma. Ua maea foi ona sue tusi o galuega ua maea ona fai, tuuina atu lipoti a le suetusi, faapea foi ma le revised development plan a le itumalo, faatasi ai ma le annual plan. Sa ou faapea ma ou mimita, ai o lenei itumalo o le itumalo o lea e muamua i luma o le poloketi lenei. e le o i ai foi se faaaliga po o se tusi mai le Minisita ma le Matagaluega, o le a faamuta le toe tuuina mai o tupe a lenei itumalo, ona o le le faamalieina o vaega ia. Ae lagona lava lo ta faanoanoa ua agiga i upega tafailagi, e tasi lenei o itumalo, e le o mulimulitaia faiga faavae a lo tatou Malo. O le mea lea ou te... leaga o la e faafogafoga tapuai mai si ou itumalo o Falelatai ma Samatau, o lo o galulue malosi le tatou komiti ma le tatou itumalo, i le faatinoina o le tatou poloketi. E pau lava le vaega lea tatou te faatali i ai i le taimi lenei, po o le a le taimi e maua ai le tatou miliona. Ae o fuafuaga ma galuega uma a le komiti, ua maea faataatitia mea uma, ae pau lava lena o le vaega lena e faatalitali i ai le komiti ma le tatou itumalo, po o le a le taimi e maua ai le tupe.

O le mea lea e toe avatu ai le faamalosiua ma le faamalo i lau Afioga i le Minisita faapea foi le Minisita o Tupe, talosia ia lata mai se taimi e mafai ai ona maua tatou tai miliona, se i faatino tatou poloketi. Aua o lea o le a savali le 3 tausaga, ae o lo o tau faamautu lava, ou te le faitio foi i le tulaga ma faafitauli o lo o i ai lenei poloketi. Aua e le o po se lilo i lenei Maota, e pei foi ona maua i nisi o saunoaga, e fou le poloketi lenei, o se taimi muamua lenei ua faatino ai. O le tele ia o le mau faafitauli, e anoanoai faafitauli o le faamoemoe lenei. O se faamoemoe lelei, ae ona e fou, o le

mea foi lea ia onosai ia le Malo, i faafitauli e pei ona tulai mai i lenei taimi. E manatu o se avanoa lelei lenei e tatau ona tatou faasoa ai. Aua e eseese lava itumalo ma faafitauli o lo o tulai mai ai, ae maumau pe ana faapea e i ai se avanoa tatou te nonofo lelei ai i lalo, e le gata i lenei Itu o le Maota ae faapena foi i lenei Itu, ae tatou velo aso ma brainstorm le faiga o le poloketi lenei, aua e eseese uma lava faafitauli lea e tulai mai i itumalo. Ae maumau pe ana faapea e mafai ona soalaupule lelei, ina ia mafai ona faasoa atu foi ma faasoa mai ma o tatou ogatasi ai i se faiga e mafai ona faagasolo a lenei faamoemoe taua o le Malo.

O le mea lea, na ona matou faamalosi atu ma faamanuia atu i lua afioga i Minisita aua le tulai mai i le taumafaiga o lenei poloketi. Alofagia foi e le Atua le siigamai a le Afioga i le Minisita, sau se taimi oi luma toe taliu mai ma le manuia ma toe faafoisia le malosi atoatoa e faatino ai lona valaauina.

O le isi vaega e fia oo i ai se manatu o lenei itumalo o totogi o faiaoga o ekalesia. E tasi lea vaega sa maua foi i folafolaga a lo tatou Malo, a tulai mai, e totogi e le Malo ia faiaoga o ekalesia. O le tele ia o le sao o ekalesia i le tulaga tau aoaoga, a o lo o struggle foi pe utiuti tupe o lo o maua e ekalesia e faatino ai a latou aoaoga. E le laititi ia paketi a ekalesia eseese a lo tatou atunuu o lo o alu i tulaga tau aoaoga. A o ai lea e manuia ai? O lea e manuia ai lo tatou Malo. O le mea lea ou te lagolagoina ma ou faamanatu atu foi i le Malo, a lava lau faasoa, manatua ane totogi o faiaoga a ekalesia mo se faamama avega mo i latou.

FOFOGA FETALAI: Tulai mai lau Afioga i le Minisita.

Susuga Hon Laauli Leuatea Polataivao Fosi: Lau Afioga i le Fofoga Fetalai, sina mea laititi lava lea na ona manino e faamalamalama ai le saunoaga a le sui usufono. E sao lelei le saunoaga a le sui usufono, e tasi lenei faiga faavae o lea na taoto i le anavatau a lenei vaega. O lea faatoa 16 masina, faatoa 16 masina talu ona matou tulai e tauave le Malo. O le tuualalo la, ia lava mai le onosai. E le faigofie le galuega o lo o tau sort out atu nei le mau mea o lo o fai. O le tatalo lenei, o lea ua e saunoa i le tatou poloketi miliona, a mea o le auga lenei o faiga mea sa fai atu ai lava i le amataga, Omai tatou fale, o lea e avanoa le Ofisa o Tina ma Tamaitai, omai e tatou talanoa. O lea ua fai le tatou PMU, omai e faasoa, talanoa po o le a le mea lea e toalia ai le tatou poloketi. Ae na ona ou faapena atu, o lea faatoa 16, 17 masina talu ona tulai le tatou Faigamalo. A o le mea lenei o le galulue faatasi, o le tatalo foi lenei a lenei Itu. Omai tatou faasoa, tatou soalaupule po o le a le mea e agai i ai i luma le mataupu. O le lelei ma le faaletonu o komiti ma le faasoaina o tupe, o lenei e i ou aao lau afioga i le Taitaifono. E leai lava se isi e foia o outou, ae pei o le tatalo lava lenei o lea na avatu i le amataga, tuu ia lenei mea o le tatou feupuai i lenei poloketi.

Ua tatou iloa uma, o le miliona e aoga i tatou itumalo ma le atinaeina. O si au toe tulai atu lea ma le agaga faaaloalo.

FOFOGA FETALAI: Faafetai, e taua tele le saunoaga lea a le Minisita, lau afioga i le sui usufono, ona o lea na taua le soalaupule, o lea ua saunoa manino le Minisita, o lo o avanoa lava le Matagaluega e soalaupule ai tulaga o mea faapena, ae le mafai ona tatou talanoaina i le tatou Palemene. Ua i ai faiga faavae a le Matagaluega aua le poloketi. O le 3 tausaga lea na e taua ua faagasolo, lea ua saunoa le Minisita o lea faatoa 17 masina o lenei nofoaiga. O le mea lea ia onosai ma lavapapale. Ae faauma maia le saunoaga a le sui usufono mamalu.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau Afioga i le Fofoga Fetalai, o lea foi ua saunoa faamalamalama ia le Afioga i le Minisita o Faatoaga, e momoli atu le agaga faafetai. Ae o manatu ma fautuaga na ua tuuina atu i le Afioga i le Minisita e tauala atu i lipoti o le 9 masina ua tuanai atu, atonu e maua foi nisi avanoa e avatu ai nisi fautuaga i lipoti faaletausaga, a o le agaga lena o lea e tau tulituli atu, e momoli atu le agaga faafetai.

Ona o lou taimi ua uma, lau Afioga i le fofoga fetalai, e tele nisi o mea o lo o i lau lisi sa ou fia oo i ai, ae tumu lenei itumalo i le ava ma le faaaloalo i lau Afioga i le Fofoga Fetalai. E momoli atu ai le faamalo, ia manuia tele lau Afioga i le Fofoga Fetalai, faapena lena Itu o le Maota. Ia talosia foi le siiga gasegase i le Afioga i le Palemia ma nisi o le Kapeneta ma le tatou Palemene, se aso o i luma toe taliu mai ma le manuia.

E avatu foi le faamalo i Ofisa Sili o Pulega o Matagaluega ma Faalapotopotoga a le Malo ua mafai ona tatou fonu i lenei aso ma o latou lagolago i le Malo ua tulai mai. E faapea foi le afioga i le Failautusi ma le Ofisa o le Fono, ia manuia foi le tapuaiga a si ou itumalo o Falelatai ma Samatau, ae ou ola i le alofa o le Atua, faafetai.

FOFOGA FETALAI: Malo saunoa i lau Afioga i le sui usufono, faafetai foi mo lou sao, e tele foi lou sao ua tuuina mai e fatufatu ai foi le agai i luma o le tatou Faigamalo, aemaise o le tele o nai itu taua ia ua e faatauaina mai, malo saunoa i lau Afioga i le sui usufono.

E na o se fesoasoani atu i lau Afioga i le Minisita o Faatoaga ma Faiga Faiva, leaga o lea ua taua le lisi o itumalo lea ua avatu i lau afioga. Vaai le tusi talosaga a Safotulafai ma Sapapalii lena ua avatu, i tei ua galo i lau Afioga. O lea e faalogologo mai si ou itumalo.

O le avanoa lenei o se tasi o sui usufono. Tulai mai lau Afioga i le sui usufono o Safata 1.

Afioga LEAANA RONNIE POSINI (Safata 1): Lau Afioga i le Fofoga Fetalai, aemaise le paia o lenei Palemene, le afio o le Afioga i le Sui Palemia o le Kapeneta, Minisita Lagolago, aemaise foi o lenei Itu i le Sui Taitai. E faatalofa atu foi i le paia o le Malo, i le susu i le susuga i Le Ao Mamalu o le tatou Malo, le Sui o le Fono o Sui Tofia, aemaise le tapuaiga a Samoa. Ou te manatu o lenei avanoa lelei e fai ai foi se manatu o lenei itumalo i lenei foi Tala Faaopoopo o le tupe, e i ai ni nai manatu aua le faufauga o le tatou faigamalo mo le agai i luma.

Ae avatu nai manatu o lenei itumalo. E muamua ona ou faafetai i le Minisita o le Soifua Maloloina, i le tulaga lea na taua e isi sui, o le falemai o lenei itumalo. E ui lava e le i tino mai, ae o lea ua maea le tulaga e tatau ona faatino ai. o lea foi ua i ai tupe ma mea uma lava i le faagasologa. E pau lava le mea lea na ta talanoa ai o le lisi o le fanua lea e faatino ai le falemai. E pei o le faatuai lea, e lelei foi le malamalama o le matou itumalo, e pei o le aiga lea e a ia le fanua lea latou te tosoa le galuega a le falemai o le itumalo. Ia lafo atu i lau afioga, e fai i ai le faaiuga a lau afioga, ae o la ua manino le maotu itumalo, o la e tosotoso e le aiga e a ia le fanua, ia le tulaga o le falemai. E pei ona taua, o lea ua toe sau foi le faamai, ou te talitonu ua tatau ona faatino le tulaga lea.

E tele foi nisi fanua o le itumalo, e mafai ona ofoina e faatino ai le falemai, pe a fai o le tulaga lea o lea ua toso e le aiga lea le falemai, e pei e foliga mai e fau muamua le falemai ona fai ai lea o le lisi tele pe \$5,000 pe \$10,000 i le masina. Ae lafo atu i lau Afioga i le Minisita e i ai le tofa ma le faautaga.

E talosaga foi i taligalu a le nuu lea o Sataoa, si o matou nuu o Sataoa ma Saanapu, lea sa talia e le faigamalo talu ai, ia le faiga o taligalu ia. Ae le mafai lava ona tuua le matou taugologolo i lau Afioga i le Minisita o Siosiomaga. O lea na talia e le faigamalo, lafo atu i lau Afioga, i le tulaga o le fesuiaiga o le tau ma tulaga faapena, o lea ua manino e tele le afaina o nai o matou nuu ia o le matou itumalo.

E faafetai tele i le Minisita o Galuega, o lea ua matau o lea ua faagasolo le toe faataina o auala ia o matou i Salamumu e le i maea ona faata. Aua ua fia sefulu tausaga o lo o taumafai le auala lea, ae faafetai o lea ua tafa le tofa i lau Afioga e faaauau, le auala lea o le matou nuu i Salamumu. O lea e momoli atu ai le agaga faafetai tele i lau afioga.

Ona oo mai lea o se matou tala lau Afioga i le Fofoga Fetalai, ona oo mai lea i galuega faavaitaimi. E talitonu lava o galuega ia, e tasi lea manuia o le tatou atunuu i tulaga o galuega faavaitaimi, e le tau faia se mau po o se tala i lea mea, uia tatou silasila i aiga, aemaise aiga o matou itumalo i tua. O aiga ua nonofo i maota lelei ma laoa. Ua feoai foi i taavale ua le tasi ua le lua. Ae o le siitia foi o le tamaoiga e tautua i le ekalesia ma le nuu, o galuega ia. Ae o lea ua maua o lea ua taofi, fai mai e taofi mo sina taimi. Ae o le faanoanoaga lau Afioga i le Fofoga Fetalai, o le taofiga lea e taofi

ai e tatou, ae le taofi ai galuega o lo o manaomia mai fafo. o lona uiga o le taumafaiga lea e taumafai i ai le Malo, e iu lava ina le toe maua ni avanoa e avatu ai tagata faigaluega a lo tatou atunuu. Aua e le faatalitalia ia galuega o le tauina o le apu, fualaau aina po o le a, e le faatalitalia maia ia tatou.

O la ua agai ia falefaigaluega nei, e o agai i Fiti o Toga, atunuu o le Pasefika, e toe tapa atu tatou i ai, ae ua leai se avanoa o i tatou. E pei o lea e tau matau atu, ou te le o manino lelei, po o i ai fuafuaga a le Malo e aveese motu galuega nei, o lou faanoanoaga lea. O le manuia lenei o aiga taitoatasi, e pau tonu lava i aiga. E pei foi ona taua e le isi sui usufono, o lea ua taofi ma galuega a lo tatou Malo i le PSC ua taofi galuega ia, taofi le o i fafo, ua matua feteenai lava, aua o lea na taua mai faapea, ua leai ni tagata faigaluega ua o uma i i, ae o lea ua toe aumai le faatonuga a le PSC e taofi tagata faigaluega a le Malo, e pei e foliga mai o le a tau fai se suesuega faapea o le a toatele ia tagata faigaluega. A o le sulufaiga lea o le tatou atunuu, o galuega faavaitaimi ma galuega a le Malo.

O lona lua lau Afioga, lea na taua e isi, ia pisinisi ia, o laisene ia e faafou nei, e pei o lea ua uma ona faamanino e le Afioga i le Sui Palemia.

FOFOGA FETALAI: Sei tuu atu le avanoa i le Sui Palemia i lana saunoaga e faamalamalama ai le tulaga lea.

Afioga Hon Tuala Tevaga Iosefo Ponifasio: Faafetai i lau Afioga i le Fofoga Fetalai, ou te fia talanoa atu i le mataupu ua laga i le malaga i fafo i galuega faavaitaimi. E sao lelei le sui usufono mai Safata, o le faaiuga ua taoto nei i le Kapeneta ma le tatou Faigamalo, se i taofi le aveina o tagata i fafo mo sina vaitaimi, o se taofiga le tumau, ona e i ai mafuaaga. Ua tulai mai ni faafitauli ogaoga lava i le ave lea o tatou tagata ae le o faatulaga lelei aiaiga aemaise o faiga faavae a lo tatou Malo e ave ai o tatou tagata i fafo. E manumanu tele le Malo lenei, i soifua aemaise foi o le faaaogaina o tatou tagata o le tatou human resource e isi atunuu, aua e i ai le mea e tau o le exploitation po o le faaaogaina foi lea, ae e le o lelei ona tau, e le o lelei foi le mataituina e le tatou Malo, ae faapea foi kamupani o lo o faigaluega ai o tatou tagata. E pei e faavae lava nei mea i le alofa. Ae e leai se agaga o le malo e taofia lenei polokalame matagofie o lo o faapea ona manuia ai aiga ma afioaga faapea ekalesia.

O le fuafuaga a lo tatou Malo, ina ia taofi mo sina masina lava se tasi. Sa fai foi le poloaiga a le Kapeneta i le soa komiti ina ia tapena loa faiga faavae ia i le 3 vaiaso ma toe lipoti atu faiga faavae ia i le Kapeneta mo le soalaupulega a le Kapeneta, ona fai loa lea o se isi faaiuga i luma atu. Mo le silafia e le tatou Palemene, sa o matou galulue i le vaiaso lea na tea nei, sa faatino le tulaga lea. E le i malolo le komiti lenei, o lea e faafofoga mai le afioga ia Toeolesulusulu, o ia lea o lo o Taitaifono i le komiti lenei, o le uunaina o faiga faavae, lea la ua maea, o lo o tapena lelei le tuuina atu i

luma o le Kapeneta. O le agaga lea, a outou afioga, e leai se isi e faatauagavale i le lelei o lenei polokalame, ae o lo o taumafai, ia aua nei alu i le alu lea e le faatapasaina. A ia alu i luga o aiaia ua fuafuaina lelei aua le saogalemu o tatou tagata. E manumanu foi i le itu foi lea o le va faale-Malo, le va o Samoa ma Niu Sila ma Ausetalia, e manumanu tele i le tulaga lena. O le mea foi lena e faaeteete ai tele se faaiuga i le polokalame lea. O lea o lo o i ai pea fesootaiga ma atunuu nei, ia nofo malamalama i le mafuaaga, taatia ia penefiti tatou te maua mai, ma le penefiti e maua e tatou kamupani ma tatou malo i fafo, ae se i tagai lava le Kapeneta i lo tatou atunuu. O a foi aafiaga i le tatou aganuu, ma tu ma aga o lo o masani ai agaifanua i totonu o itumalo ma afioaga, i le tulaga foi lele ne i te i ua ave ave le toatele i fafo, ae leai nisi e tautuaina alii ma faipule ma aiga i totonu o nuu, ae o lo o i ai aafiaga foi lea o le fai atu o le fonu a matai ae leai se faleupolu pe leai ni taulelea e tautuaina le fonu.

E pei o itu uma na lea o lo o agai i ai le tapenaga lea o faiga faavae o le polokalame lava ia i fafo o le lelei o le polokalame mo tatou lelei foi mo kamupani o lo o agai i ai a tatou tagata faigaluega. E tatau ona avanoa tutusa uma o tatou tagata faapena foi lo tatou Malo aemaise foi... it has to be a fair deal aua nei, o le taimi lenei ua amata ona ola kamupani Niu Sila faapea fo Ausetalia ua faatupulaia tagata e invest i totonu o pisinisi nei ona o le agai atu o tatou tagata e siitia le tulaga o le tamaoaiga i totonu o pisinisi nei. O lo o i ai foi le popolega e le faatusaina Niu Sila ma Ausetalia. E silafia foi na tulai mai loa le Malo o Ausetalia lea na i ai talu ai nei fai loa le announcement faalauiloa i le lalolagi atoa o le a mafai ona o atu tagata Samoa e 3000 i le tausaga e nonofo mau i Ausetalia i le 3 tausaga ma galulue i Ausetalia. O nei mea e leai ma se fesootaiga ma lo tatou Malo o a latou fai lea la ua amata ona faagasolo le ave o tagata e faigaluega i le 3 tausaga. E i ai le manatu e le o toe foi, ua o atu ai tagata e tautuaina le tatou tourism industry, tatou hospistality industry o le tatou skill labour, ua avatu ai faiaoga ua avatu ai leoleo ia avatu ma matai o le matou aiga. Ioe, e le o se tulaga lelei le tulaga lea o le manatu o le Kapeneta ia tatou tutu faatasi i le mea lea. E tatau ona tatou tapena lelei ia maioio ma maeaea lelei tatou faiga faavae ia ona toe faagasolo foi lea o le tatou fesootaiga ma tatou paaga ave tatou tagata ia. O le tala lea ae faamalulu atu i nai uso foi o lo o faapena ona aumaia pea lenei mataupu e le mafai ona tuua leaga o le mataupu e aoga tele, e aoga tele foi le tamaoaiga o si tatou atunuu i le aumai lea o le tupe sau i totonu a ia fai fuafua ma tatou o manino.

Ia e pei o le tala atu lea ma le faaaloalo lava e tau faapupula atu ai le tulaga ua i ai le tatou RSE ae lava pea le onosai. Ma le faaaloalo lava lau afioga i le Fofoga Fetalai.

FOFOGA FETALAI: Ia mo le faasaoina lava o tatou taimi o lea ua manino le saunoaga a le Malo i galuega faavaitaimi i te i foi ua toe lauga mai ai se isi a o lea ua manino le saunoaga a le Malo i tatou galuega faavaitaimi ina ia faasaoina le tatou taimi. Lea foi e tau maitau atu i sui usufono mamalu pei o lea tau fou mai foi i pisinisi ia o lea ua uma ona folasia le saunoaga a le Sui Palemia mo ia tulaga ia ma le manatu o le faasaoina o le tatou taimi. O lea ua tali manino le tatou Malo e le manaomia foi le toe tali faalua ma le alu ai o le tatou taimi.

O le fesoasoani atu mo tatou sui usufono mamalu mai Safata.

Afioga LEANA RONNIE POSINI: Faafetai tele i le afioga i le Sui Palemia i tulaga ua tali manino. Pau lava lea, e faatepa lau afioga i le tele ia o tatou tamaiti ua iu mai aoga leai ni galuega, ua oo lava i tatou tamaiti lea ua maua faailoga ua leai ni galuega i totonu o le tatou atunuu. Ia ae o le mea foi lea o le tautuaina o afioga i tua i fonu a matai e le o tupu lava lena mea. O lea foi ou te tautua i tua i lo matou itumalo e le o tupu ua leai ni taulelea la e fau lava tagata o le tatou atunuu. E pei e tau faapena atu, o le agaga lea sa tau atu o le taofi ae aveese ia avanoa la ua o ia kamupani nei i Fiti, Toga, toe o atu tatou ia ua leai ni avanoa. Ia e pei e faapena le tuualalo atu lau afioga i le Sui Palemia. O tulaga ia o pisinisi ia laisene...

FOFOGA FETALAI: Ia ou te iloa lea ua manino le saunoaga a le afioga i le Sui Palemia e le o taofia, na o le tasi a le masina lea na taofia ai a o lea ua tapena faiga faavae, ia vagana se isi mea lau afioga i le Sui Palemia lea ua manino lau saunoaga.

Afioga Hon Tuala Tevaga Iosefo Ponifasio: Ia faafetai lau afioga i le Fofoga Fetalai leaga ou te le i fia tali atu i le mea lea na e saunoa mai ai faapea ua o Niu Sila i isi atunuu. O le mea e tatau ona silafia e ese le fiafia o Niu Sila ma Ausetalia i tatou tagata Samoa o le premium lea o le resources lea e manao mai ai ia Niu Sila ma Ausetalia, ma e le o tupu lena mea ma o le lagona foi o le Kapeneta ia o, aua a o e toe foi mai lava i i ona o Samoa o lo o manuia ai Kamupani nei. E le tutusa tatou ma isi tatou uso i Fiti. E pei o le tali atu lea ia tatou onosai, tatou onosai ia o lo o mau pea le toovae i le Kapeneta aemaise foi tatou paaga i Niu Sila ma Ausetalia. Faafetai.

FOFOGA FETALAI: Ia tulai mai lau afioga i le Minisita o le Soifua Maloloina.

Afioga Hon Valasi Luapitofanua Toogamaga Tafito Selesele: O le isi mea o lo o iloilo i ai le Kapeneta e le o i le Kapeneta ia Tuivalea. O le mea sili ona taua, a silasila i ai ae fai visa a le au RSE lenei, o le vave ia, ae afai

visa a le public lautele tatou e online, ae umi lava ona faatali. Ae o le a le fefaatauia la mea ia leaga e le o malamalama ai le sui usufono mo Safata 1 i mea ia.

O mea ia tau faafetauaiga, o le isi mea o loo fai pisinisi ai agent i tua a tatou o loo maua e le Kapeneta e tai \$1000 le totogi o le tamaititi e toatasi, tai \$1500 isi agent. E leai se mea e tasi a le Malo o maua mai ai. O le ala lea o le tilotilo o le Kapeneta i se auala mamalu ma lelei aua e le i faia e le tou Malo ua mavae ni faiga faavae lea la taumafai o le taimi lenei sei tau kiligi atu le gasu lea e i ai. E manino la le sui usufono, o vala ia lea e tilotilo i ai le Kapeneta. Silasila ia Niue ae alu e te asiasi ia Niue, ua tu na o fale ua vaoa fale ua leai ni tagata na o le 1000 ma ona tupu. E mafua i se a? E fia o i fafo, faatosina gofie ia o latou tagata i le mea o le alu i fafo ma le nofomau ai. A o le fesili; o a ituaiga manuia lea e saili e tatou ? E le o le ave a o le tele o taavale a le aiga faapea ua manuia po o le faletele ae ou te talitonu o le manuia o le sao o le loto o le tagata i le Atua. Tatalo i aso uma aua nei i ai ni faalavelave e tutupu le aoaoga lena lau afioga i le sui usufono mamalu.

O le fesoasoani atu lea afai e te le malamalama ia o le mea lena lea ua faamalamalama atu, fefaatauaiga a Malo afai tatou te tuu pea le avanoa i sui nei ma ave ma ave e fai atu le visa o le faigofie ia. Ae a oo ina apalai le visa a tagata lautele a Samoa, ia o le umi ia na tuli mea la ia le tau faafetaui ia ma visa mai. O visa mai seiloga oi sole o le matautia ia ae afai la tatou te le faafetoaia le metotia lea e aumai mai o ma le atamai o Niu Sila ma Ausetalia ia taufai tutusa itu uma, ia oomi a le komepiuta nei maua le visa o le Minisita po o le sui usufono, a o le mea lea e i ai nei e toso ai a toso ai a tatou le faafetoaia faalelei le siso ia paleni. Ia manuia le Fono.

FOFOGA FETALAIA: malo faafetai. Mo le faasaoina o le taimi se i tulai mai lau afioga i le Minisita o Galuega Tetele.

Tofa Hon Olo Fiti Afoa Vaai: O le mataupu lea o le matua tele a o le aafiaga. Ma o lea foi sa talatalanoa le Kapeneta e leai lava se Matagaluega e le o aafia. O lau vaega ua toatele sinia lelei ua o i galuega faavaitaimi ona o le leai o se faiga faavae sa faataoto e le Malo talu ai e puipuia ai le Malo i ana tagata faigaluega. O le isi foi la mea taua e tatau ona silafia e le sui usufono mamalu, ia o lea ou te talanoa faa-Economist ia oe o le population e taua tele i le tamaoaiga lau afioga i le sui usufono mamalu. Ua ova ma le 10 afe lea ua o atu pei ua lalata i le 20 afe lea o le a o i galuega ia ua faaletonu atu ai ma le tatou tamaoaiga pe afai o le faiga lea. Ou te iloa po o e manatua e le i faia le palota na ou talanoa ai i le tou faigamalo i le mea lea, o lo o iloa uma e le atunuu lau tala sa fai. E le tatau ona faaauauina le mea lea. E mafua ona ou fai atu i le mea lea e le o lelei le treat ina o tatou faigaluega moni a. E le o lelei ona e le o lelei foi ona faataoto faiga faavae

ma maliliega sa fai e toatele tagata ua malilliu mai. O isi vaeatu lava le faafogafoga mai a le atunuu ma le Maota e le o lelei mea nonofo ai. Ia o isi foi mea toetiiti a uma le totoi o toe tipi i o galuega la e fai leai ni tupe o aumaia. E leai lava ma nisi o Matagaluega o le tatou Malo e le o aafia i le mea lea. O le ala foi lena o lea e umi ai ona toe fai se review ma faataoto lelei ni faiga faavae e fai ai le mea nai lo o le mea lea sa fai, e faasapasui uma faapena ona fai le faiga o le mea ma tatou aafia ai. E leai ma se tupe a le Malo o maua mai ai. O tau malamalama mai? Ia faafetai lau afioga i le Fofoga Fetalai.

FOFOGA FETALAI: Malo faafetai.

Afioga Hon Lautafi Fio Selafi Purcell: O le mea e fia faasao lau afioga.

FOFOGA FETALAI: I lou tulaga faa-Sui Taitai o le Itu Agai po o lou tulaga faa...

Afioga Hon Lautafi Fio Selafi Purcell: Leai o le tulaga faa-sui usufono lau afioga, sa aafia i mea ia e saunoa mai ai, sina faamalamalama i le tatou atunuu.

Lau afioga leaga o lea ua le tasi, faalua ona lafo mai e Minisita ia saunoaga faapea sa leai ni faiga faavae, sa faasoloatoa, sa faasapasui. Ia o latou lava na finagalo, sa i ai uma lava tulaga ia. Sa i ai leaga o lea e faafogafoga mai le atunuu i tulaga ia e lagalaga. O mea a ia latou lea ua o atu suesue ni mea e faaleaoga ai mea sa fai e le Itu lena ona fai mai lea sa... Ia o mea ia e saunoa mai ai le Sui Palemia sa fai ae leai ni tulafono faapisinisi e leai sa i ai. Lea ua outou o atu e teuteu ae le o le fai mai lea ua matou o atu e fai leaga e leai ni mea sa i ai lau afioga. There is a different lau afioga e toe o atu e teuteu lau afioga ua fetai ma le taimi o latou.

FOFOGA FETALAI: Ia tulai mai lau afioga i le Sui Palemia

Afioga Hon Tuala Tevaga Iosefo Ponifasio: Ia faafetai leaga o lea ua taua e le sui usufono lea o lea e faafogafoga mai le atunuu. Atonu sa i ai ni feagaiga sa tau tapena i lena vaitaimi o lo o manino pea lea matou te feagai pea ma Ofisa Sili ia ma Matagaluega sa latou faatautaia lava le mataupu lea. O latou lava lea o lo o talanoa mai ma fautuaina foi le matou soa Komiti. Sa i ai feagaiga i le va o tatou ma Niu Sila ia faapea foi ma Ausetalia e le faamoemoe la i feagaiga na e faufau ai le faaletonu lea. Sa i ai. O le mea moni a faapea na i ai ni outou faiga faavae lea ua tatou matauina lau afioga i le Fofoga Fetalai, le taimi lea ua latalata i le faiga palota na malepe ai le fale o le Ekalesia. Na toe soli lava e le Malo le faiga faavae ua outou tatala, o i ina na i ai le faaletonu ua lolofi mai le atunuu ua

fia malaga i fafo i le galuega lea o i ina, masalo o se foliga vaaia po o se mau foi lena o le faaletonu o le faiga faavae ua tatala le avanoa. E le aoga la ni faiga faavae sa i ai lea la ua omai le Malo fou, o lea ua matou toe tapena, e leai se tulaga teuteu ua matou toe tapenaina ni faavae e faamuamua Samoa sosoo atu ma Malo i fafo. E pei o le agaga lea e fia avatu ai lau afioga. A na faapea na i ai ni fegaiga po o ni faiga faavae sa i ai, ua faaleaogaina lava i le taimi lena. O le mafuaaga ua outou talepe le fale lea o le Ekalesia, ina ua outou tatala le avanoa e lolofi mai ai le mamalu o le atunuu. Ia o le mafuaaga lena ua leai ni faiga faavae ua alu faale-tapasaina le tulaga o le tatou RSE i lena vaitaimi atonu foi e faatupu manatu.

FOFOGA FETALAI: Ia ua ese lava le mea lea ua oo iai.

Afioga Hon Lauofo Fonotoe Nuafesili Pierre Lauofo: E tatalo atu mo se avanoa leaga o lea a ou te nofo ma ou matau ma tau faalogologo i le Minisita o Matagaluega, lea ua ou le malamalama ua matua tele Minisita ua tali mai lea mataupu. A o le mataupu e faigofie le mataupu ae ua le logomalie foi saunoaga tuulafoai faapea o matou na talepea le fale o le EFKS. Matou te le i talepea se... Ioe, o le avanoa sa tatala i i e tau aumai ai tagata ma o le mea moni a ia i le tulaga sa i ai leaga e tatau ona fai sau tala i le vaega lea ona e puipui i le afaigaluega a le Malo, latou ia lea e galulue faatasi i le faataatiaina o faiga faavae. Sa i ai faiga faavae, sa tuu le avanoa i lou uso a faipule aua o ia tonu sa Minisita I le galuega i le vaega ua tuanai, sa i ai faiga faavae la e molimau le afaigaluega a le Malo afai sa faataitai atu ae tulai mai ai ni faaletonu...

Afioga Hon Toeolesulusulu Cedric Pose Salesa Schuster: Lau afioga i le Fofoga Fetalai...

Tofa Hon Lauofo Fonotoe Nuafesili Pierre Lauofo: Ia o le faiga lava na o le soifuaga, ae toe fetuunai, toe fetuunai a fai e toe vaaia atu e le lelei lea faiga, sui se isi faiga. O se vaaiga e sili atu ona lelei...

FOFOGA FETALAI: Ia o lea ua maua lou finagalo...

Tofa Hon Lauofo Fonotoe Nuafesili Pierre Lauofo: Ae le faatusatusaina i tatou i isi atunuu. Ia ma aua ne i galo o Niue o tagata sitiseni i Niu Sila. O Cook Island o tagata sitiseni i Niu Sila.

FOFOGA FETALAI: Ia o lea ua maua lou finagalo...

Tofa Hon Lauofo Fonotoe Nuafesili Pierre Lauofo: O la e faigofie ona o latou i Niu Sila, ae o tatou, e tau apalai le Visa, e ese le Visa Faigaluega, ese le Visa o le tagata e alu e tafao.

FOFOGA FETALAI: Ia o lea ua maua lou finagalo...

Tofa Hon Laufo Fonotoe Nuafesili Pierre Laufo: E ese o na e silafia o la e faafofoga mai ia le atunuu. E tele ni eseese o mea ia e tatou te talanoa ai ae pei e foliga mai o lea o le a numi faatasi. O le a numi faatasi nei mau mea.

FOFOGA FETALAI: Ia ua lelei, o lea ua maua lou finagalo lau afioga i le Sui Taitai, ia...

Tofa Hon Laufo Fonotoe Nuafesili Pierre Laufo: Lau afioga i le Fofoga Fetalai, o la e i ai ia Faiga Faavae. A fai sa i ai se lape po o se sisi, toe fetuunai, o le avanoa lena o outou. Toe fetuunai ae tatou vaavaai la i tou Faiga Faavae, ia silasila lelei.

FOFOGA FETALAI: Ia o lea ua fai atu le faatonuga a le Fofoga Fetalai, ua tauau ona e le mafaufau mai i le Fofoga Fetalai ma lau faatonuga.

Tofa Hon Laufo Fonotoe Nuafesili Pierre Laufo: Faafetai i lau afioga i le Fofoga Fetalai mo le avanoa. A lea sa tuu mai le avanoa, faafetai.

FOFOGA FETALAI: Ia, ua i ai le manatu, ua ou faagataina ia le mataupu lea. Ua faasolo foi ina o tatou o i tulaga ua amata foi ina o tatou fetusitusilima ai. Ua i ai le agaga o le Nofoa, o lea ua manino le saunoaga a le Malo. O lea foi ua manino mai ia le tou saunoaga, ua i ai le manatu tatou faatea ia mea i nuu i tua. O lea ua o tatou agai i luma, o lea ua saunoa manino ia le Sui Palemia o lea ua galulue i le taimi nei.

O lea e tau tulai mai ia le Taitaifono, ia o la ua ua galulue mo le manuia o le agai i luma. O le mea lea, ua ou faagataina ia le mataupu lea, ia ma o lea ua le o toe mamao foi ia le tatou malologa. O le mea lea, faauma mai le saunoaga a lau afioga i le sui usufono mamalu, aua le toe taea tulaga ia o lea ua fai atu le faaiuga a le Nofoa.

Afioga LEANA RONNIE POSINI: Ia faafetai tele i lau afioga i le Fofoga Fetalai, e le toe oo foi i ai se tala a lenei itumalo. Faafetai foi i Minisita i le afioga i le Sui Palemia sa tau malamalama ai, ae pei ua tulai mai loa isi Minisita ia, ia ua atili ai ona le malamalama ia le tatou Palemene. Ia faafetai tele.

Ia ona oo mai lea o se tala i mea ia o laisene na taua e lau afioga i le Fofoga Fetalai, o mea ia o laisene o pisinisi. E pau lava lea o lau tuualalo i lau afioga i le Sui Palemia, o lea e pei ua tau matau ua silasila totoa tele lau afioga i nai a tatou faipisinisi ia mai Saina. Ae o le tau faanoanoa lava, o le

tau o igoa o le atunuu. Ae e silafia e lau afioga, a tatou tilotilo lelei i le atinae o Samoa, o le atunuu lea o lea e tele lona sao i totonu o le tatou atunuu i le faiga o le tatou tamaoaiga ma a latou fesoasoani.

Ae e pei ua faapitoa lau saunoaga ua tautino tagata Saina nei, aloalovao lau afioga, leaga e le na o Saina lea e faipisinisi i totonu o le tatou atunuu, manumanu i le tatou va faavaomalo. Ao le atunuu foi lea o Saina, o lea ua tatou iloa o le atunuu e pito sili ona malosi, malosi le tamaoaiga, malosi foi ana meatau. Tatou aloalovao ai faapena lau afioga i le Fofoga Fetalai.

Ae o le isi mea...

Afioga Hon Tuala Tevaga Iosefo Ponifasio: Lau afioga i le Fofoga Fetalai...

FOFOGA FETALAI: Leaga o lea ua taua le suafa o le Sui Palemia, ia se i tulai mai.

Afioga Hon Tuala Tevaga Iosefo Ponifasio: Ia malo le mataalia foi ae e taua le tulaga lea i Saina, e ao lava ona faamalamalama a tau le Saina, e le faapea o le Saina mai i Saina. E eseese uma lava auala e omai ai ia tagata Saina nei i Samoa ae o le toatele lava o latou e omai mai i Saina. Ia aua e i ai Saina mai i main China, Hong Kong o Saina uma lava mea na, Taiwan.

Ae mo le silafia e le tatou Palemene, o nisi nei o tagata ua omai, o le Tulafono lenei, e le patino i Saina, o so o se foreigner. O ni tagata e le o ni tagata atunuu o Samoa. O Saina la nei e omai, o nisi e ui mai i Cook Island nisi tagata. E ui mai i Niu Sila, ua sitiseni i Niu Sila nisi Saina. E omai i Toga nisi Saina. E omai eseese, e o mai i Ausetalia, pe o fea lava e omai ai tagata nei, ona ai lava o le atunuu. E saolele lava le saunoaga, leaga o le atunuu malosi. O le atunuu foi e maumea.

E pei la o le tulaga lea, e le faapea na o... a tau Saina e omai solo lava, o isi tagata e omai o tagata ua i ai sitiseni Samoa. Ioe ae pei o le tulaga foi lea e lilifa i ai se faamalamalama, ona o tagata foi e ese le nanau e lelei le latou faatinoina o pisinisi. Ma e i ai foi faiga ua manino lelei i ai lenei Matagaluga, o faiga foi ia faaaloalo pe faasolitulafono ina ia mafai ona faatino pisinisi foi ia faasolitulafono i totonu o Samoa.

O i ina lea e sau ai le popolega. A tatou agai loa i tagata na, aua o lea e maua uma lava ia faamaumauga. A finagalo i ai e mafai ona aumai e silafia e le tatou... e le o avatua ni lagona foi lea faapea ona o le vaaiga lautele. O faamaumauga lea o lo o i ai le popolega. E tasi le Saina, ae 15 pisinisi e lesitala. Ia e faafefea la ona fai ia ituaiga mea faapea i le tagata e toatasi?

Ae e toe foi lava lau tala ona e pei lava o tagata nei e le patino i tagata mai i Saina. O tagata eseese nei ae o tagata mai i fafo, o latou nei o lo o faapena ona taatele i tua ia le faatinoina o latou pisinisi. O na ua outou silafia, e tasi lava ia le tou silasila i le tou o atu i Vaitele agai i Mulifanua,

o le tele o faleoloa ua run e Saina. Aua la ne i faapea mai e sese oe Tuala. Leai, o le popolega lena ma ua tau mai i le Matagaluega lena ia atugaluga o le atunuu lena, o i ina lea e mafua ai ia manatu nei.

E le o ni mea foi na nofonofo foi lava Tuala fai. E le faailoga tagata ia le Matagaluega lena. E matou te manumanu i le tulaga lena, o la foi e tou te silafia, sa outou i le Palemene i le Kapeneta muamua, tou te galulue ma Ofisa Sili o le Malo, ia aemaise foi o le lagolagosua i Tulafono a le Loia Sili. O mea nei e faapena ona galueina ma faatulagaina.

E pei o le tali atu lea, ae sao lelei lava, faamalulu atu foi i se faafofoga a lau afioga ma le faafofoga a le Palemene nei, ia aemaise o tatou uso mai i Saina, e le o aafia ia le tatou va Faale-Malo. I le taimi nei, e vevesi uma tagata ia Saina, o lo o lelei pea le va i fafo le va o le tatou Malo ma le Malo o Saina. Ae e pei o le vaega lea e moulu mai i i, moulu mai i lea e omai fai pisinisi ia ona o lea e aumai e le tatou Malo i le Visa lea Temporary Permit to do business, e tatau ona taofi le mea na. Ioe ia aua ne i omai tafili saunao e na o le 3 masina e sau ai ae sau faatu le faleoloa supermarket.

O mea ia o lo o silasila totoa i ai le Malo, e tatau ona i ai ni puipuiga. E tatau ona i ai ni puipuiga i tatou faipisinisi, ia i ai foi le puipuiga mo le tatou atunuu.

Faafetai mo le avanoa lau afioga i le Fofoga Fetalai.

FOFOGA FETALAI: Ia, faafetai...

Tofa Hon Lauofo Fonotoe Nuafesili Pierre Lauofo: Lau afioga i le Fofoga Fetalai e na o se faamanatu, masalo...

FOFOGA FETALAI: Lau afioga i le Sui Taitai, se i fai atu le tala a le Nofoa...

Tofa Hon Lauofo Fonotoe Nuafesili Pierre Lauofo: Lau afioga i le Sui Palemia, o la e i ai le tatou Tulafono foi lea o le Reserve List...

FOFOGA FETALAI: Se i fai atu le tala a le Nofoa...

Tofa Hon Lauofo Fonotoe Nuafesili Pierre Lauofo: E le mafai ona sau se tagata mai i fafo i le 3 masina sau faatu se faleoloa. E le mafai, o lea e molimau le Tulafono.

FOFOGA FETALAI: Lau afioga i le Sui Taitai.....

Afioga Hon Tuala Tevaga Iosefo Ponifasio: Ia se i ou tali atu pea...

Tofa Hon Lauofo Fonotoe Nuafesili Pierre Lauofo: O mea na e tatau ona silasila totoa, masalo only a handful of people ae o lea o le a taofi atoa

ai lava ia laisene pisinisi ma isi mau mea. Ia se i toe silasila totoa, leaga o tupe maua a le Malo, o lea e fia totogi ia alauni ia e taofia, ovataimi lea ua taofi uma, ae o lea e fia maua ni tupe e totogi ai, ma le faaaloalo.

FOFOGA FETALAI: Ia, se i malie lava lau afioga i le Sui Palemia, ua tatou see ese lava ma tatou Faiga Faavae Faa-Palemene. Lau afioga i le Sui Taitai, a e toe tulai e fai sau faauilavea faanoi mai i le Nofoa. E tou te silasila mai i le Kapeneta e oo foi i le Palemia e faanoi mai i le Nofoa. A ua fai soo lava le mea lea e lau afioga i le Sui Taitai. Ua tauau ina o tatou see ese ma Faiga Faavae a le Palemene lenei.

O le mea lea, ua ou manatu, o se fautuaga foi mai i le sui usufono mamalu foi o Safata, lau afioga i le Sui Palemia o le taua foi o nai o tatou uso mai i Saina, e i ai foi le agaga faapena o le Nofoa, e i ai foi le faaeteetega o le Nofoa i tulaga ia. O nai tagata foi o lo o galulue foi mo le atunuu. Ia e i ai le manatu faapea o le Nofoa, ia e manatu lava o le tatou Fono o lo o silasila uma i ai le atunuu aemaise foi o tatou paaga.

Ia ona i ai lea o le manatu o le Nofoa faamolemole le tatou Maota, ia o tatou silasila mamao foi i tulaga faapea ia aua lava ne i afaina se faafofoga a le atunuu aemaise foi ia nai a tatou paaga ma uso o lo o tatou galulue faatasi. O le fesoasoani lea a le Nofoa, ia ae ua o tatou taunuu i le tatou taimi malolo.

Ua i ai le manatu o le a tatou talosia ia, e momoli atu lava le agaga faamalo ma le faafetai i sui usufono mamalu sa sausaunoa, sei vagana ai ia sui usufono oso faafuasei mai ia ma taufaoa atu ai taimi o le Palemene, ia o le mea lenei ua laitiiti se faafetai mo outou. Faafofoga le tatou Maota i tou saunoaga, ia faafetai ia outou ia sa saunoa i mataupu taua.

Tatou talosia nisi saunoaga a isi sui usufono mamalu o le a mulimuli mai mo le Tala Faatatau Faaopoopo o le Tupe i le tatou taimi faatulagaina. Ua faamaonia le lafo mo le faagasologa o le tatou galuega, o lea ou te faasilasila atu ai, o le a faataatiaese ia tatou Taulumaga seia tatou toe tauaofia i le itula e 3:00 i le aoauli nei. Ae o lea ua tapena ia le tatou taumafataga o le aoauli, e na o e lava sa usitai, o lea ua tapena la outou taumafataga.

Ia faataatiaese ia tatou Taulumaga seia aulia le itula e 3:00 i le afiafi.

Na faataatiaese Taulumaga a le Fono Aoao Faitulafono mo lana malologa i le itula e 1:04 i le afiafi.